

## Peqqussutissatut siunnersuummut oqaaseqaatit

**Oqaaseqaatit nalinginnaasut**

Kalaallit Nunaannut inatsisip nr. 469-ip 6. november 1985-imeersup nioqutissanik pissaqartitsiniarmut, angallannermut, allakkanik isumaginninnermut il.il. tunngasup atuutilerneratigut Kalaallit Nunaannit aamma Kalaallit Nunaanni allakkanik ingerlatsisussatut pisussaaffeqarnermi malittarisassanik aalajangersaanissamik piginnaatitaaffik aammalu Kalaallit Nunaanni allakkerineq Namminersornerullutik Oqartussanut nuunneqarpoq.

Qallunaat Nunaanni allakkeriveqarnermik suleqateqarneq suli pisariaqartinneqartoq eqqarsaatigalugu, Kalaallimmi Allakkeriviata (maanna POST Greenlandip) nassiussat suliarisartagaasa affai tassaammata Danmarkimut aamma Danmarkimit nassiussaasut, Kalaallit Allakkeriviat pillugu inatsisartut peqqussutaat nr. 5 8. november 1985-imeersoq qallunaat allakkerinnermut inatsisaat nunat tamalaat akornanni allakkanik ingerlatsinernut isumaqatigiissutit toqqammavigalugit aalajangersagaasoq malillugu suliarineqarpoq.

Kalaallit Allakkeriviat pillugu inatsisartut peqqussutaata nr. 15 30. oktober 1992-imeersup atuutilerneratigut Kalaallit Allakkeriviat KNI A/S-imut immikkoortortanngorpoq. Inatsisartut peqqussutissaannut oqaaseqaammi allassimavoq Kalaallit Allakkeriviat sapinngisamik niuernermi periaatsit atorlugit ingerlanneqassasoq, kiisalu akit akitsuutillu nalinginnaasumik aalajangersarneqartariaqartut ingerlatseqatigiiffiup siulersuisuinit. Tassungalu ilassutigineqarpoq naatsorsuutigineqartariaqassasoq akinik aalajangersaanermi innuttaasunut atugassarititaasut eqqarsaatigalugit politikkikkut periusaasut atortinneqaannartariaqartut, tassalu pingaartinneqartoq akit qaffasinnerpaaffilerneqartarnissaat, taamaattumillu Kalaallit Nunatsinni aammalu Danmarkimut nassiussanut pingaaruteqarnerpaanut, tassalu allakkanut, poortukkanut aammalu aviisinut akit Naalakkersuisunit akuersissutigineqaqqartassasut.

TELE Attaveqaatit allannortiternerat pillugu inatsisartut peqqussutaata nr. 8, 6. juni 1997-imeersup atuutilerneratigut Kalaallit Allakkeriviat (maannakkut POST Greenland) KNI Pilersuisoq A/S-imiit Nalunaarasuartaaseriveqarfimmut (ullumikkut TELE Greenland A/S) nuunneqarpoq. Tassunga ilutigitillugu Kalaallit Allakkeriviat pillugu inatsisit nutarterneqanngillat, taamaattumillu allakkerineq pillugu inatsisip nutarterneqarnissaa piffissami sivisujaami pisariaqartinneqarsimavoq.

Naalakkersuisut isumaqarput peqqussutissatut siunnersuusiornikkut nutarterisoqarpat tulluarnersasoq allannuutissatut kissaatigineqartut annertungaatsiarmata, tassa Kalaallit Nunaanni Allakkeriveqarnermut inatsisartut peqqussutaata taartissaanik.

## *A. Maleruagassat maanna atuuttut*

POST Greenland-imut inatsisitigut ullumikkut tunngavisoq tassaavoq Kalaallit Allakkeriviat pillugu Inatsisartut peqqussutaat nr. 15, 30. oktober 1992-imeersoq, Inatsisartut peqqussutaatigut nr. 7, 6. juni 1997-imeersukkut allanngortinneqartoq.

Inatsimmi atuuttumi § 21-p nassuiarneqarnera POST Greenlandip Air Greenland A/S-illu saaffiginnissuteqarneratigut Naalakkersuisut inatsisip nutarternissaa iliuuseqarfigaat. Aalaja-ngersagaq ima nassuiarneqarpoq TELE Greenland A/S aalajangersaasinnaasoq Air Greenlandimit imaluunniit assartuisartunit allanit ingerlatsisussatut pisussaaffilerneqarlutik nassiussanik nassartussaataasunit malinneqartussamik. Ingerlatsisuunermut aallaviusariaqarput nammineerluni isumaqatigiissuteqarnerit. Naalakkersuisut aammali assartuineramik ingerlatsisussaataasut tulluartautinngilaat inatsisitigut TELE Greenland A/S pisussaatinneqarmat aalajangersaasussaataasutut. Siunnersuummi erseqqissarneqarpoq siullermik anguniarneqartariaqartoq namminerisamik isumaqatigiittoqarsinnaanera. Illuatungeriit isumaqatigiissinnaassanngikkaluarpata Naalakkersuisut piumasaqarsinnaapput Air Greenland A/S imaluunniit assartuisartoq alla aalaakkaasumik nassiussanik angallassisartoq nassiussanik pinngitsoorani angallanneqartariaqartunik nassartussanngortillugu, soorluttaaq siunnersuutigineqartoq Naalakkersuisut nassiussanut taamatut ittunut aalajangersaasinnaasut.

## *B. Peqqussutissatut siunnersuutip imaa – Immikkoortut pingaarnertit*

### *I. Assartuisartut allakkanik ingerlatsisussaataanerat*

Peqqussummi atuuttumi ingerlatseqatigiiffik (TELE Greenland A/S) tassaavoq assartuinermi nassiussanik pinngitsoorani angallanneqartariaqartunut malittarisassiorsinnaatitaasoq angallassisartut malittarisassaannik.

Siunnersuummi puigorneqanngillat POST Greenlandi tassaasoq ingerlatsisussatut pisussaaffilerneqarnikuusoq aammali assartuussisartut allat Naalakkersuisunit pisussaaffilerneqarunik allakkanik assartuisussaataasut. Taamaattumik peqqussutip allanngortinneqarnissaata siunnersuutigineqarnerani pingaartinneqarpoq Naalakkersuisut taakkuussammata assartuussisartunut aalaakkaasumik nassiussanik angallassisartunut peqqusisartussat nassiussanik pinngitsoorani angallanneqartariaqartunik nassaqqusillutik, soorluttaaq aamma siunnersuutigineqartoq Naalakkersuisut nassiussanut taakkununnga piumasaqaatinik aalajangersaasinnaanissaat.

### *II. Niuernermi piumasaqaatit*

Aammattaaq niuernermi piumasaqaatit nalinginnaasut kiffartuussanit takuneqarsinnaasut suliarinissaat, taassumalu saniatigut POST Greenlandimi sulisut akunnerminni atugassaannik ilitersuusiornissaq siunnersuutigineqarpoq, allakkeriveqarnermi ilitersuummut ullumikkut atorneqartumut, suliffeqarfip iluani sulinermit maleruagassanik, avammut saqqummiutissallugit naleqqutinngitsunik,

aammalu maleruagassanik POST Greenlandip sullitaanut tunngatinneqartunik ataatsimoortitsiviusumut taarsiullugu. Suliffeqarfiup iluani ilitersuusiassa pingaartumik ilanngaaserinermut assigisaannullu atatillugu suleriaasissanut maleruagassanut sillimaniarnermilu suleriaatsinut, avammut saqqummiutissallugit naleqqutinngitsunut atugassatut eqqarsaatigineqarpoq. Niuernermi piunasaqaatit nalinginnaasut maleruagassanik, POST Greenlandip sullitaanut tunngassutilinnik imaqartinneqassapput.

### III. Angallassisussaatitaanermi killissarititaasut

Erseqqissarneqassaaq, ingerlatitseqqiinissamik pisussaaffik taamaallaat illoqarfimmuut nunaqarfimmulluunniit qaninnerpaamut atuuttuummat. Siunnersuummi matumani nunaqarfittut taaneqartoq tassaavoq, sumiiffik Pilersuisup Naalackersuisunut isumaqatigiissuteqarnermigut nioqqutissanik ulluinnarni atugassanik inuussutissarsiornermilu sakkussanik pilersuiffiusussamik pisiniarfeqartissallugu pisussaaffigisaa, innuttaasunut atugassamik innaallagissiorfilik assigisaanilluunniit ataavartumik innaallagissamik pilersuiffilik, kiisalu assartuinikkut aalajangersimasumik sullinneqartoq.

### IV. Nunanut tamalaani susassaqarfiit

Kalaallit Nunaanni allakkeriveqarneq pillugu peqqussut naapertorlugu qallunaat allakkeriviata allakkerinikkut susassaqarfinni Kalaallit Nunaanni sinnerlugu isumaginnittuvoq. Post Danmark A/S-ip qallunaat allakkeriviata ingerlanneqarnera tigusimavaa, taamaattumillu siunnersuutigineqarpoq, Post Danmark A/S Kalaallit Nunaat sinnerlugu nunarsuaq tamakkerlugu allakkerinikkut susassaqarfiinik isumaginnittuulissasoq.

### V. Remail

Allakkat pillugit Nunarsuaq tamakkerlugu isumaqatigiissummi allannguuteqartitsinerup ki-ngunerisaanik nassiussanik ingerlatitseqqittarnermut aalajangersakkamik nutaamik atuutsitsisoqalernissaa siunnersuutigineqarpoq. Allakkat ingerlateqqinneqartut tassaapput allakkat, allakkanik nassiussinermut akini nunarsuarmilu nassiussuinerminni nunat akunnerminni akiliisarneranni assigiinngissutaasut atorluarniarlugit Kalaallit Nunaanni assartorneqartussanngorlugit agguanneqartussanngorlugillu nunami allamiit tunniunneqartut.

### VI. Allakkanik nakkartitsisarfinnik nivinngaaterinissamik piunasaqaat

Allakkat qaatiguuliukkat agguannissaannut POST Greenlandip periarfissaqarnissaa qulakkeerniarlugu siunnersuutigineqarpoq allakkanik nakkartitsisarfiit pillugit aalajangersagaliortoqassasoq, tassanilu maleruagassat erseqqinnerusut Naalackersuisunit aalajangerneqartassasut.

### VII. Akinik akuersisarneq

Peqqussummi atuuttumi takuneqarsinnaavoq Naalackersuisut akuersisartuusut Kalaallit Nunaanni, Savalimmiunut aammalu Danmarkimut allakkat akiinut.

Akinut akuersissuteqartarneq taama isikkoqartillugu atuutsiinnarneqarnissaa siunnersuutigineqarpoq.

Akuersissuteqartarnerup taassuma atuutsinneqalerneratigut akuersissuteqartarnek annertusisussaavoq nunat allat ilanngunneqassammata, tassami POST Greenlandip akinik aalaja-ngersaanermi kingullermi Danmark nunat allat ataannut inissimmagu. Naalakkersuisut aalajangersaavigisinnaasaasa annertusineqarnerat tunngaveqartinneqarpoq POST Greenlandip akinik aaqqissueriaasiata allangortinneqarneranik, akinik aaqqiissuteqarnernik pinnani. POST Greenland akinik aaqqissuussinissamut nammineq allannguisinnaavoq, peqqussut atuuttoq mannalugu siunnersuut malillugu. Akinut akuersissuteqartarnek taama isikkoqartillugu Naalakkersuisut atuutsiinnarumavaat, allakkat Kalaallit Nunaanneersut amerlanerpaartaat Danmarkimut ingerlasuusarmata, taamaattumik Naalakkersuisut pingaartuutippaat Danmarkimut akiusup nakkutiginissaa.

#### VIII. Taarsiissuteqartarnek

Siunnersuutaasut taarsiissuteqartarnermut maleruagassanik allakkat pillugit Nunarsuaq tamakkerlugu isumaqatigiissummut, aammattaaq atuutsinneqartumut, naapertuuttunngortitsis-sapput. Peqqussummi taarsiissuteqartarnermut aalajangersakkat assartuisinnaatitaanermut nalinginnaasumut maleruagassanut naleqqussaagaapput. Aamma siunnersuutit nassiussanut ataasiakkaanut tunngatillugu taarsiisussaataitanermut erseqqissaatinik imaqarput.

#### IX. Aningaasat nassiussat allagartaat

Siunnersuutigineqarpoq, aningaasat nassiussat allagartaannut taarseeqqusilluni nalunaarnissamut periarfissarititaq ukiut marlunnik sivilisussuseqartoq ukiumut ataatsimut appartinneqassasoq. Aningaasat nassiussat allagartaat atorlugit nassiussinerit nalinginnaasumik nassiussisup tiguisussallu akornanni isumaqatigiissutaareertarput, nalinginnaasumillu fax-ikkut nassiunneqartarlutik, tamatumalu kingunerisaanik allakkat ingerlaarnerat ullup ataatsip ingerlanerani pisarpoq, taamaattumillu ukiut marluk piffissarititassatut pisariaqanngitsumik sivilisullaarlutik.

#### X. Kingunerisanik iluarsiiinerit

Kiisalu Kalaallit Nunaanni allakkeriveqarnerup KNI Pilersuisoq A/S-imiit Nalunaarasuartaaseriveqarfimmud (ullumikkut TELE Greenland A/S) nuunneqarneranut atatillugu kingunerisassat arlallit iluarsiivigineqarnissaat siunnersuutigineqarpoq.

#### *C. Allaffissornermut sunniutissat*

*Siunnersuutip Namminersornerullutik Oqartussanut kommuninulluunniit allaffissornikkut sunniuteqarnissaa naatsorsuutigineqanngilaq.*

Siunnersuutip innuttaasunut allaffissornikkut sunniuteqarnissaa naatsorsuutigineqanngilaq.

#### *D. Aningaasaqarnermut sunniutissat*

*Siunnersuutip Namminersornerullutik Oqartussanut kommuninulluunniit aningaasaqarnermut sunniuteqarnissaa naatsorsuutigineqanngilaq.*

Siunnersuummi § 22-mi malitassatut saqqummiunneqartut tunngavigalugit, tamatuma kingorna Naalackersuisut malittarisassiussallutik ilaqutariinnut ataatsinut illut aammalu illut sanileriaat isertarfiisa eqqaanni allakkanut nakkartitsivinnik kiisalu inissiani quleriaani allakkanut ilioraavinnik ikkussuinissanut, allakkanut nakkartitsivimmuut matukkulluunniit nakkartitsivimmuut innuttaasup aningaasartuuteqarnissaa naatsorsuutigineqarpoq.

Allakkat tamarmiusut 70%-iisa missaat postboksiniit qaatiguuliorneqartarput, tamannalu innuttaasumut ataatsimut ukiumut 200 kr.-inik akeqarpoq. Allakkanut nakkartitsivik innuttaasup 200 kr.-it inorlugit akiliilluni pisiarisinnaassavaa.

Ajornartorsiut tamanna nunaqarfinni atuutinngilaq, nunaqarfinni allakkanik agguassisoqarneq ajormat. Allakkat POST Greenlandip suleqatigisaanut aaneqartarput.

Malittarisassat atuutinneqalernerinut atasumik innuttaasumut allanik aningaasartuuteqartoqarnissaa naatsorsuutigineqanngilaq.

#### *E. Avatangiisinut sunniutissat*

Siunnersuutip avatangiisinut sunniuteqarnissaa naatsorsuutigineqanngilaq.

#### *F. Inuussutissarsiornermi aningaasaqarnermut sunniutissat*

Siunnersuummi § 22-mi malitassatut saqqummiunneqartut tunngavigalugit inuussutissarsiornermi aningaasaqarnermut sunniuteqarnissaa naatsorsuutigineqarpoq, tamatuma kingorna Naalackersuisut malittarisassiussallutik ilaqutariinnut ataatsinut illut aammalu illut sanileriaat isertarfiisa eqqaanni allakkanut nakkartitsivinnik kiisalu inissiani quleriaani allakkanut ilioraavinnik ikkussuinissanut, allakkanut nakkartitsivimmuut matukkulluunniit nakkartitsivimmuut innuttaasup aningaasartuuteqarnissaa naatsorsuutigineqarpoq.

Malitassani qitiususaaq tassassaaq, assersuutigalugu inissiarsuarnik allakkanut matukkut nakkartitsivinnik/allakkanut nakkartitsivinnik pilersuinissamik piunnaasaateqarfiusunik sanaartornissaaq, tamatumalu sanaartornermut tamakkiisumut annertunngitsunik aningaasartuuteqarnerunermik nassataqartarnissaa naatsorsuutigineqarpoq.

Aningaasaqarnermut sunniuttussat allakkanut nakkartitsivinnik, allakkanut matukkut nakkartitsivinnik imaluunniit postboksiniit peqartinnagu allakkanik tunniussisinaanerup ajornarsinaaneranik peqquteqartutut isigineqassaapput.

Maleruagassiornermut atatillugu allanik inuussutissarsiornermi aningaasaqarnermut sunniuteqartoqarnissaa naatsorsuutigineqanngilaq.

#### *G. Naalagaaffeqatigiinnermut namminersulernissamullu attuumassuteqarneq.*

Namminersornerullutik Oqartussat § 10, imm. 1, inatsimmi 577, 29. november 1978-

imeersutigut Namminersornerullutik Oqartussat (Namminersornerullutik Oqartussat pillugit inatsisit), pisussaaffilerneqarput isumaqatigiissutit allallu peqqussutit nunarsuarmi tamarmi atuuttuutuusut, Naalagaaffiup iluani pituttuisuusut malissallugit. Piumasaqaataavoq isumaqa-tigiissutit taamatut ittit Namminersornerullutik Oqartussanut oqaaseqarfigisassanngorlugit saqqummiunneqartarnissaat, tak. § 13. Tamatuma imaraa POST Greenland Allakkat pillugit Nunarsuaq tamakkerlugu isumaqatigiissutit allannguuteqartillugit pituttugaammat Danmarkip atortuulersitseqataaffiit Kalaallit Nunaata nunarsuup suatungaani inissisimaneera apequtaatinnagu.

Post Danmark A/S-ip POST Greenland nunarsuaq tamakkerlugu allakkeriveqarnermut tun-ngassutilinni sinniisuuffigaa, tak. qulaaniittoq. Ileqquvoq, Post Danmark A/S-ip Kalaallit Nunaannut attuumassuteqartunik allannguisoqassatillugu POST Greenlandimut isumasiui-sarnera imalunniit peqataatitsinissanut periarfissiisarnera.

Siunnersuut Naalagaaffeqatigiinnermut namminersulernissamulluunniit sunniuteqassanngilaq.

#### *H. Tusarniaaneq*

Siunnersuut marloriarluni tusarniaassutigineqarsimavoq, tassa siullermeerluni tusarniaassutigineqarnerani peqqussutissatut siunnersuummi akissutigineqarsimasut tunngavigalugit allanngortiterisoqarsimammat. Tamatuma saniatigut Naalakkersuisut naliliisimapput tusarniaaffigineqartut amerlineqartariaqartut, taamaasiornikkut assartuisartut attuumassuteqartut tamakkiinerusumik § 21-mi aalajangersagassatut siunnersuutaasoq isummerfigisimasinnaaniassammassuk.

Siunnersuut ukununga tusarniaassutigineqarsimavoq: Aqutsinermut Pisorta qarfik, Air Alpha Greenland A/S, Air Greenland A/S, Artic Umiaq Line, Inuussutissarsiornermut, Nunalerinermut Suliffeqarnermullu Pisorta qarfik, Aalisarnermut Piniarnermullu Pisorta qarfik, Kulture-qarnermut, Ilinniartitaanermut, Ilisimatusarnermut Ilageeqarnermullu Pisorta qarfik, Avata-ngiisinut Pinngortitamullu Pisorta qarfik, Namminersorneq Pillugu Pisorta qarfik, Peqqissut-simut Pisorta qarfik, Ilaqutarinnermut Pisorta qarfik, Unammilleqatigiinnermut Ataatsimiititaliaq aamma Atuisartunut Siunnersuisoqatigiiffik, Kalaallit Nunaanni Sulisitsisut Peqatigiiffiat, Kalaallit Nunaata Eqqartuussivia, Namminersornerullutik Oqartussat Qarasaasiaqarfiat, ILIK, IT-rådet, KANUKOKA, Ineqarnermut Attaveqarnermullu Pisorta qarfik, Naalakkersuisut Allattoqarfiat, Pilersuisoq, Politimestereqarfik, Post Greenland, Naalagaaffiup Sinniisoqarfia, Royal Artic Line, Aatsitassanut Ikummatissanullu Pisorta qarfik, TELE Greenland A/S, Nunanut Allanut Pisorta qarfik aamma Aningaasaqarnermut Pisorta qarfik.

#### *I. Tusarniaanernut akissuteqaatit.*

Uku oqaaseqaaseqateqarfigissanagu nalunaarsimapput: Aqutsinermut Pisorta qarfik, Air Alpha Greenland A/S, Air Greenland A/S, Artic Umiaq Line, Inuussutissarsiornermut, Nunalerinermut Suliffeqarnermullu Pisorta qarfik,

Aalisarnermut Piniarnermullu Pisortaqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqarfik, Avatangiisinut Pinngortitamullu Pisortaqarfik, Namminersorneq Pillugu Pisortaqarfik, Peqqissutsimut Pisortaqarfik, Ilaqutarinnermut Pisortaqarfik, ILIK, KANUKOKA, Qaqortup Kommunia, Aatsitassanut Ikummatissanullu Pisortaqarfik aamma Akileraartarnermut Pisortaqarfik.

POST Greenland Inatsisartut peqqussutissatut tusarniaassutigigititaannut imatut oqaaseqaateqarpoq:

"§ 1, imm. 1-imut

"Kalaallit Allakkeriviat" imaasillugu allanngortinneqassaaq "POST Greenland"."

Naalackersuisut POST Greenlandip oqaaseqaataa siunnersuummut ilanngussimavaat.

"§ 4

Nunaqarfiup suussusiata assigiinngitsumik isummersorfigineqartarnera pinaveerumallugu, tamanna oqaaseqaatiniluunniit paatsuugassaangitsumik nassuiaaserneqartariaqarpoq. Assersuut: "Nunaqarfiit tassaapput Pilersuisup Naalackersuisut isumaqatigiissuteqarfigalugit pisussaaffigalugit ulluinnarni inuussutissanik atortussanillu nioqquteqarfiusussamik pisiniarfeqartitai, kiisalu aalajangersagaasumik angallassissuteqarfigisai".

Naalackersuisut POST Greenlandip oqaaseqaataa siunnersuummut ilanngussimavaat.

"§ 6

Siusinnerusukkut POST-ip pisortaqarfimmut nalunaarutigereersimasaatut, POST-imit isumaqatiginninniutigiuminaatsorujussuuvoq, pisortaqarfiup aalajangiusimajuassappagu POST-ip inatsisitigut akitsuutinik suliaqartussaatinneqarnera, tamanna POST-imut naammaginangitsorujussuuvoq. Siunnersuut aaqqitaavoq, nioqqutissanik eqqussuineq annissuinerlu pillugit inatsisartut inatsisaannut, POST Greenlandip tamatumani pisussaaffiinik aaqqiiviginnittumut, § 6 innersuussisunngorlugu.

"§ 11

Paragraffi una ilanngunneqarsimavoq allakkanik ingerlatitseqqittarneq (remail) illuatungilersinnaajumallugu. § 11 Post Danmarkip inatsilerituuisa allagaat naapertorlugit allanngortinneqarpoq. POST-imit isumaqarfigineqarpoq allanguutissap allaqqaarnerani, tassa allakkanik ingerlatitseqqittarnerup inerteqqutaaneraniq allassimasoq ajunnginnerulluinnaraluartoq POST-ip "nassiussanik tigusiomasinnaannginneraninngarnit", tamanna inatsisinik unioqqutitsinerussanngikkaluarmat. § 11 kukkusaasorinavippoq, tassanimi Danmark allaqavoq Kalaallit Nunaat pineqarani."

§ 11-ip allanngortinnera Allakkat pillugit Nunarsuaq tamakkerlugu isumaqatigiissutit allanngornerannik tunngaveqarpoq, tamannalu Danmarkimit Kalaallit Nunaata

nunarsuup suatu-ngaani inissisimanera apeqqutaatinnagu akuerseqataaffigineqarsimavoq. Tamatuma kingunerisaanik Kalaallit Nunaat isumaqatigiissummik maleruaanissaminik pisussaaffilerneqarsimavoq. Taamaattumik peqqussut Allakkat pillugit Nunarsuaq tamakkerlugu isumaqatigiissutitut naapertuuttunngorlugu naammassinnissinnaalersinniarlugu aaqqiiviginiarneqarpoq. § 11-ip oqaasertai tusarniaassutip oqaasertaanut naapertuuttumik nutserniarneqarsimapput.

"§ 22

Uiguut "-sinnaavoq" titarnermi siullermi atorineqartoq peerneqartariaqarpoq, maleruagassat taakku pigineqartussaammata."

POST Greenland-ip inassuteqaataa siunnersuummut ilanngunneqarsimavoq.

"§ 25, imm. 2

Inatsisartut peqqussutissaattut siunnersummi pisorta qarfiup akigititatsinnut akuersisinnaassusertik annertusarsimavaat. Inatsimmi atuuttumi allakkat nunatta iluani, aammalu DK kiisalu FO-mut atuuttut Naalakkersuisut akuersissutigisarpaat, maannali siunnersuummi "Nunat allat sinnerinut" akuersissutit aamma ilanngunniarneqarlutik. Tamatuma tunuliaqutaa paasiuminaappoq.

POST-imit siunnersuutigineqaralarpoq nunap iluani akiusuinnaat aalajangersaavigineqartassasut. Tamatumunnga illersuutaasinnaasumik tunuliaqutaavoq, POST-i angallassinissamut pisussaaffilerneqarsimammat kisermaassisussaataallunilu, taakkulu akissaannut Naalakkersuisut aalajangiisarnissaat naammakkalarpoq.

Poortukkatut nassiussat akii aamma suli akuerineqaaqqaartartussaapput, taakkunungalu aamma POST angallassisussaataavoq kisermaassisinnaatitaanili - unammilleqatigiinnerlu sakkortuvoq. Taamaattumik akueriuminaappoq POST-ip akigitinniakkaminik Naalakkersuisunut akuersisitseqqaartariaqartarnera. Poortukkanik nassiussisartut POST-ip akigitinniagaanut sullissineranullu naammaginninngikkunik allanut saaffiginninnissamut periarfissaqarluarput."

Naalakkersuisut isumaqarput Kalaallit Nunaanni poortukkanik angallassinermi akigititaasut isorartussuseq, annertussuseq sumiissuserlu najoqqutaralugit assigiinngitsorujussuusut. Taamaattumik akigitinniakkat unammilleqatigiinnermut akisussaaffiliissutiginnissaat ernumanartuuttipaat. Naalakkersuisut akinik aalajangersaasarnermikkut qulakkeersimajumavaat, poortukkanik Kalaallit Nunaanni nassiussisarnernup Naalakkersuisut naammaginnartitaattut akeqartittuarnissaa.

"Naggataarutaasumik oqaaseqaat.

POST-i naggataarutaasumik oqaaseqaateqarpoq, tassalu poortukkat pillugit Inatsisartut peqqussutissaattut siunnersuummi Inatsisartullu peqqussutaanni atuuttumi peqqussutitut allannguutissanik Inatsisartut aalajangersaassasut, soorlu ukunani: § 4 imm. 2, § 6 imm. 1, § 16 imm. 3, § 20 imm. 3 kiisalu § 22 imm. 1. Qulaani pineqartut pillugit Pisorta qarfik POST-imit oqaloqatigineqarsimavoq,



isumaqatigiissutigineqarporlu peqqussutit pineqartut taakku Pisorta qarfimmit POST-imillu piaartumik suleqatigiissutigineqassasut."

Ajornartorsiutit pineqartut aqqiissutissaannik Naalakkersuisut nalunaarutissamik suliaqalereerput. Naatsorsuutigineqarpoq nalunaarutit taakku inatsisartut peqqussutissaata atuuttuulernissaa peqatigalugu atuuttuulersinneqarumaartut.

Namminersulernissamut Pisorta qarfiup tusarniaassut ima akissuteqarfigaa:  
"Namminersulernissamut Pisorta qarfik siunnersuutip saqqummiunneqarnissaanut uparuaassutissaqanngilaq.

§§ 12 aamma 15 unioqqutinneqarsinnaanerinit pineqaatigiissutissanik ilanngussisoqarsimanngilaq (tak. § 41). Tamanna puiguinerunerluni? Taamaanngippat pineqartumut isumalioqqutaasut nassuiaatini ilanngunneqartariaqassapput."

Peqqussutissatut siunnersuummi §§ 12 aamma 15 § 41-mi ilanngunneqarput, taamaasilluni unioqqutitsinerit Kalaallit Nunaanni pinerluttulerineq pillugu inatsit tunngavigalugu pineqaatigiissuteqarfigineqarsinnaassallutik.

"§ 41 (massakkut § 39) tunngavigalugu POST Greenland suliani ataasiakkaani taarsiisussan-ngortitaasinnaavoq taarsiisussaataaernerimik peqqussutit nalinginnaasut malillugit, ajutoorneq POST Greenlandip nalinginnaasumik taarsiisussaataaerneranut atuuttoq kapitel 7 -imi taaneqarsimasoq naammagineqanngikkaangat. Nassuiaammi ilanngunneqarsimavoq aalajangiineq sulianut assingusunut piumaarsinnaasunut toqqaannartumik najoqqutassiissutaassanngitsoq. Imaannerluni POST Greenland § 41 (maannakkut § 39) tunngavigalugu aalajangiisoqartillugu ingerlatseriaatsimi assingusumik pisoqartillugu atorneqartartumut pituttorsimassanngitsoq? Suliffeqarfiit piginneqatigiiffiusut innuttaasunik nalinginnaasumik eqqartuussiveqarnikkut sullissinerup ataaniitsinneqarneq ajorput, pisariaqartitsinerli tunngavigalugu oqartussaassutsimi suliassat ilaat inunnut ataasiakkaanut tutsinneqarsinnaassapput. Apeqquq tassaalerpoq (taamaassappallu qanoq annertutigisumik) peqqussutissatut siunnersuummi POST Greenland pisortatigoortumik akisussaaffeqartitaaniarnersoq, taamaasilluni POST Greenland nalinginaasumik pisortat suliffeqarfiutaannut pituttorsimalissammat. Tamanna ersarissumik peqqussutissap nassuiaatitaani takussutissartaqanngilaq - tamatuma pisorta qarfinnit qulangersimaneqannginnissaq ersersiinnarsimanngippagu. Akerlianik peqqussutissatut siunnersuummi oqaatsit atorneqartut ilaat ("POST Greenlandip naammagittaalliutinut aalajangiineri") POST Greenlandillu aalajangigaasa Naalakkersuisunut ingerlateqqinneqarsinnaanerinit imallit allatut paasinninnissamut tunngavissiisimapput. Inissisimanagerli qanorluunniit ikkaluarpat akueriuminaappoq POST Greenland eqqartuusseriaatsimi assingusumik pisoqartillugu atorneqartartumut ilaatinneqanngimmat, akerlianillu POST Greenlandip aalajangigai Naalakkersuisunut, assigiimmik pisoqartillugu assigiimmik naliliiffiusartumut pituttugaasumut ingerlateqqinneqartartussaallutik."

Oqaasertaq " Aalajangiineq sulianut assingusunut piumaarsinnaasunut toqqaannartumik najoqqutassiissutaassanngitsoq" peqqussutissatut siunnersuutip § 39-anit peerneqarpoq.

Kalaallit Nunaanni Politimesterip siunnersuutip § 11-a malillugu unioqqutitsinerit pineqaatissiissutaasinnaanerisa atorunnaarsinneqarsinnaanissaat Naalakkersuisunut isumaliutissiissutigisimavaa. Siunnersuummi § 11-ip suliareqqinneqarneratigut POST Greenland nassiussanik tigusinngitsoorsinnaatitaalerpoq, tamannalu tunngavigalugu Naalakkersuisut pineqaatissiisarnissat allat tunngavissaaruttut naliliiffigaat. Kalaallit Nunaanni Politimesterip inassuteqaataa tunngavigalugu Naalakkersuisut siunnersuummi kapitel 9 aaqqiissuteqarfigaat, taamaasilluni § 11 malillugu unioqqutitsinerit pineqaatissiissuteqarfigineqarsinnaajunnaarput.

Aningaasaqarnermut Pisortaqarfimmit Naalakkersuisut uparuussiffigineqarput siunnersuummut nassuiaatini aammalu siunnersuummi allassimasoqartariaqartoq nalunaarutitut aalaja-ngersakkat allaffissornikkut aningaasaqarnikkullu kinguneqartinneqartariaqarnerat. Tamatuma kingunerisaanik Naalakkersuisut Naalakkersuisut nassuiaatini ima ilanngussisimapput immikkoortoq "F. Inuussutissarsiornermi aningaasaqarnermut sunniutissat".

## **Peqqussutissatut siunnersuummi aalajangersakkanut ataasiakkaanut nassuiaatit**

### *§ 1-imut*

Aalajangersakkat nassatarisaannik POST Greenlandip anguniagassat pingaarnerit makku anguniagassarissavai:

- a) Sullissinerit nunami sumiiffinni tamaginni assigiimmik piumasaaqateqarfiusumik neqeroortigineqartassapput. Pilersuisussaataaneq sumiiffinni pisariillisaavigineqarsimagaluartuni nalimmassaaviginiarlugu piumasaaqatit allat atuutsinneqalersinnaapput, soorlu Kalaallit Nunaanni nunap immikkoortuini akinik immikkoortiterinikkut.
- b) Aningaasartuutit isertitallu amerlaqatigiissapput. POST Greenland immikkut ittunik, sullinneqartunut akiliisitsinikkut aningaasartuutunik matussusiiviusinnaanngitsunik suliakkerneqartillugu suliakkiisup akiliisinneqarnissaa anguniarneqartassaaq.
- c) Kalaallit Nunaanni ineriartorneq tunngavigalugu suliassanik nutaanik tigusineq, tamatumani suliassat naammassinniarneqarneranni allakkeriviup suliassai allat eqqorneqassanngippata. Suliassanik taamaattunik isumagisaqarneq piffissap ikaarsaarfiisup kingorna aningaasaqarnikkut iluanaaruteqarfiusinnaassaaq.

d) Suliffeqarfimmi suliassat ima aaqqissuunneqassapput, sullitat pisariaqartitaat eqqarsaatigalugit suliassat isumannaatumik, naammassisarfiusinnaasumik pisariitsumillu kiffartuussinernut sullissinernullu nutaanut ingerlaavartumik naleqqussarneqarsinnaassallutik, aammalu teknikkikkut atortunik nutaanik atuutsitsilernermit suleriaatsit sapinngisamik isumalluutunik atorluaanikkut naleqqussaavigineqarsinnaassallutik pisariillisaavigineqarsinnaassallutillu.

## § 2-mut

Imm. 1 aamma 2-mut

Aalajangersakkap atuutsinneqalerneratigut POST Greenland niuernermit piumasagaatinik nalinginnaasunik, sullitanit pissarsiarineqarsinnaasunik aamma suliffeqarfiup iluani ilitsersuummik, POST Greenlandimi sulisut atugassaannik suliaqassaaq. Suliffeqarfiup iluani ilitsersuut ilanngaaserinermik il.il. suliaqarnermut atatillugu suliffeqarfiup iluani sulinermit maleruagassanik sillimaniarnermilu suleriaasissanik, avammut saqqummiutissallugit pisariaqanngitsunik imaluunniit naleqqutinngitsunik imaqaarnissaa immikkut eqqarsaatigineqarpoq.

Niuernermit piumasagaatit nalinginnaasut ilaatigut makkuninnga imaqartinneqassapput:

1. Tunisassianik kiffartuussinernillu tunniussinissamut maleruagassat.
2. POST Greenlandip tunisassiaanut kiffartuussinerninullu atatillugu taarsiisarnermit maleruagassat.
3. Maleruagassat aamma aalajangiussat POST Greenlandimit aalajangersarneqartut imaluunniit aalajangiunneqartut peqqussutissatut siunnersuutip nassatarisaanik, taakkununga ilaallutik § 17, § 19, § 21, § 23, imm. 1, aamma § 26.

§ 26 naapertorlugu POST Greenland akinut naatsorsueriaaseq, frimærkilersueriaaseq kiisalu allakkanut akit akitsuutillu malittarisassiuunneqassapput. Tamakku suliffiup iluani malittari-sassaapput, tamanit takuneqarsinnaasunik niuernermit piumasagaatinut aalajangersuinernut ilanngutassaanatik.

Imm.3-mut

Niuernermit piumasagaatit sullitanit tamanit pissarsiarineqarsinnaassapput, assersuutigalugu quppersagaq naqitaq, allakkerivinni tamani pissarsiarineqarsinnaalluni saqqummitinneqartussaq.

Imm. 4-mut

Naalakkersuisut niuernermit piumasagaatit allannguutissaattut eqqarsaatigineqartut annertuut pillugit siumoortumik ilisimatinneqassapput. Naalakkersuisut tamatumunnga atatillugu TELE Greenland A/S-imi piginnittuuneq aqputigalugu

sunniuteqarsinnaassapput, allanilli piginnaatitaaffeqassanatik akuersisussaataitanerit inatsimmiittut eqqaassanngikkaanni.

### § 3-mut

Aalajangersagaq POST Greenlandip nuna tamakkerlugu atuisunut ataasiakkaanut, taamatullu inuussutissarsiornermik ingerlataqartut allakkerisarfitsigut sullissinermik atuisoorusuttut sullinneqarneranni allakkanik ingerlassinermi, "ingerlassisussatut pisussaaffeqarnermik" taagorneqartumik, qulakkeerisussaataitanerata annertussusia pillugu nassuiaammik imaqarpoq.

Allakkat qaatiguuliukkat suunerinik sukumiisumik nassuiaammut tunngatillugu siunnersuum-mi § 8-mut oqaaseqaatit innersuunneqarput.

Aviisit ullormut saqqummersartut tassaapput sapaatip akunnerani ikinnerpaamik tallimariarlutik saqqummersartut.

Quppersakkat sapaatit akunnerannut aamma qaammammut saqqummersartut tassaapput, sapaatit akunnerannut tallimanit ikinnerusunik saqqummersartut. Quppersakkat taakku aamma qaammammut minnerpaamik ataasiarlutik saqqummersinneqartassapput.

Poortukkat qaatiguuliukkat tassaapput karsinut, imusanngorlugit imaluunniit amitsukujuun-ngorlugit poortukkat, poortukkat angisusissaasa minnerpaaffissaattut annerpaaffissaattullu POST Greenlandip niuernermi piumasaqaataani aalajangersarneqartut iluanni angissusillit.

Aammattaaq tappiitsunut nassiussanik allakkeriviup ingerlassisussaataitanera erseqqissarneqarpoq, tassanilu nassiussat qaatiguuliukkat, tappiitsut attaveqaateqarnissamut atortussaannaannik imallit pineqarput. Tappiitsunut nassiussatut nassiunneqarsinnaasut tassaapput:

1. Qattusuunngorlugit imaluunniit toornerit atorlugit tappiitsunut atugassatut allatat (aamma allakkat naqitassiallu). Tappiitsunit isigisinnaasunillu nassiunneqarsinnaapput.
2. Pappiaqqat tappiitsut qattusuunngorlugit allaffigisinnaasaat, taakku ukunanngaanniit ukununngalu nassiunneqarsimappata:  
Dansk Blindebibliotek, Teglverksgade 37, 2100 København U  
Kommunernes Landsforening, Kommuneservice, Sommerstedsgade 7, 1718 København V.
3. Nuutit båndilluunniit immiussat, tappiitsunut atugassatuinnaq naatsorsuunneqartut, taakkulu ukunanngaanniit ukununngalu nassiunneqarsimappata:  
Institut for Blinde og Svagtsynede i København, Rymarksvej 1, 2900 Hellerup  
Institut for Blinde og Svagtsynede børn, Refsnæsskolen, Kystvejen

112, 4400 Kalundborg  
Dansk Blindebibliotek, Teglværksgade 37, 2100 København U.  
Dansk Blindesamfund, Thorasvej 35, 2400 København NV og dets  
underafdelinger  
Kristeligt arbejde blandt Blinde, c/o Urenlyd Lydproduktion,  
Holstensgade 1, 2100 København U  
Kristeligt Lydbibliotek, Jernbanegade 19 A st., 7000 Fredericia  
Kristeligt arbejde blandt Blinde, Lundevej 37, 8300 Odder  
Kristeligt arbejde bland Blinde, c/o Urenlyd Lydproduktion,  
Odensegade 4, 2100 København U  
Kristeligt arbejde blandt Blinde, Finsensvej 4, Bøkkelund, 8700  
Horsens  
4. Quppersakkat (aviisit atuagassiallu) kasettebåndinut  
immiunneqarsimasut saqqummiisumut utertinneqartut.  
Saqqummiisooq tassaassaaq suliffeqarfik, imm. 3-mi taaneqartut ilaat.  
5. Kasettebåndit, tappiitsut akunnerminni nassiuttaagaat, kiisalu  
kasettebåndit inuinnartut attaveqaqatigiinnermi immiussat,  
tappiitsuniit isigisinnaasunut nassiunneqartut.

#### Imm. 2-mut

Aalajangersakkami erseqqissarneqarpoq, POST Greenland nunatsinni aningaasat nassiussat allagartaannik ingerlassissalluni pisussaasoq. Aningaasat nassiussat allagartaat tassaavoq aningaasanik nassiussisup aningaasanillu tiguisissap akornanni nuussinermut allakkerivimmit atorneqartoq.

#### Imm. 3-mut

Aalajangersakkami aalajangerneqarpoq, allakkat qaatiguuliukkat nunatsinni nassiunneqartut tammatsaalisatut imaluunniit nalingi allallugit nassiunneqarsinnaasasut.

Tammatsaaliinermi pineqartut tassaapput nassiussat (qanorluunniit ittut), allakkerivimmut tunniunneqarnerminni nassiussap tiguisissamuinnaq imaluunniit taassuma piginnaatitsissuteqarfigisaannaanut atsiornikkut tunniunneqarnissaanut, aammalu nassiussap allakkanut nalilinnut ilanngullugu assartorneqarnissaanut uppernarsaasiiffiusut.

Nassiussat nalingi nalunaarsorlugit (nassiussat nalillit) nassiunneqartut tassaapput nassiussat, nalingi qaatiguuliiffiusup nalaani kisitsisit naqinnerillu atorlugit koruuninngorlugit oorinngorlugillu allanneqartut. Naligititaasut allanneqarsinnaasup annerpaaffissaa niuernerminni piumasaqaatini nalinginnaasuni aalajangersarneqarpoq.

#### Imm. 4-mut

Aalajangersakkami aalajangerneqarpoq, POST Greenland taamaallaat poortukkanik nalingi nalunaarsorneqarsimasunik nunap iluani ingerlassinissamut pisussaaffeqartoq. Nunatsinneersunik nunaniluunniit allaneersunik poortukkanik tammatsaalisalik ingerlassinissaq pisussaaffigineqanngilaq.

#### Imm. 5-imut

Aalajangersakkami erseqqissarneqarpoq, ingerlassisussaataaneq, nunarsuarmilu isumaqatigiissutit allannguutigisinnaasaat aamma nunanut allanut, kiisalu Danmarkimut Savalimmiunullu taakkunanngaanniillu nassiussanut tunngasuusut. Allakkanik, tappiitsunut nassiussanik poortukkanillu tigusinissamut pisussaaffik nunap tiguisussap isumaqatigiissutinut sullissinernut pineqartunut akuersissuteqarnerata annertussusaa tunngavigalugu atuutsinneqassaaq.

#### § 4-mut

Aalajangersakkami ingerlassisussaataanermi suut pineqarnersut nassuiarneqarput, taamaalillunilu POST Greenlandip ingerlassisussaataanera qanoq annertutigisumut atuunnersoq nassuiarneqarluni.

POST Greenland pisussaavoq nassiussanik illoqarfimmut nunaqarfimmulluunniit qaninnermut ingerlatitseqqissalluni.

Siunnersuummi matumani nunaqarfittut taaneqartoq tassaavoq, sumiiffik Pilersuisup Naalackersuisunut isumaqatigiissuteqarnermigut nioqqutissanik ulluinnarni atugassanik inuussutissarsiornermilu sakkussanik pilersuiffiusussamik pisiniarfeqartissallugu pisussaaffigisaa, innuttaasunut atugassamik innaallagissiorfilik assigisaanilluunniit ataavartumik innaallagissamik pilersuiffilik, kiisalu assartuinikkut aalajangersimasumik sullinneqartoq.

Allakkat nalinginnaasut qanoq annertutigisumik agguaanneqartarnissaat, tassunga ilanngullugu illoqarfinni nunaqarfinnilu allakkanik agguaassisarnerup akulikissusissaa Naalackersuisunit najoqqutassiunneqassaaq. Tamatuma kingorna POST Greenland najoqqutassanik taakkuninnga qanoq atuutsitsinissaq pillugu aalajangersaassaaq. Naalackersuisut allakkanik agguaassisarnerit amerlassusissaat (akulikissusissaat) aalajangersarsinnaassavaat, tamatumalu kingorna POST Greenlandip sapaatit akunnerani ullut suut tamatuma pisarnissaa aalajangersarsinnaassallugu.

#### § 5-imut

Aalajangersakkap nassatarisaanik POST Greenlandip nassiussanik allanik siunertamut naapertuuttumik, siunnersuummi § 1, imm. 2 naapertorlugu, aammalu ingerlassisussaataanermi pisussaaffilerneqarani sullissinissaq nammineq aalajangersinnaalissavaa, tamatumalu ilaatigut kingunerisaanik suliassanik taamaattunik isumaginninneq piffissap ikaarsaarfiusup qaangiunnerani aningaasaqarnikkut iluanaaruteqarfigineqarsinnaassapput. Taamaattut tassaasinnaapput kurerforsendelse-t.

Aamma POST Greenlandip suliassat allat ingerlassinnermut ilanngutsinneqaannarsinnaasut isumagisinnaavai, soorlu suliffeqarfinnik allakkanik poortukkanillu angallatassanik piareersaasartunik aqutsisunillu suleqatigiinnissamut isumaqatigiissuteqarfiginninnerit, aaqqissuussanut kulturimut tunngassuteqartunut billetsinik allakkerivinni tuniniaanerit, aaqqissuuteriikkamik angallaveqarluni assigisaanillu angalanerit, "Santa Claus of Greenland"-ip isumaginera assigisaalu. Oqaatsit uku "POST Greenlandip suliassat allat ingerlassinnermut ilanngutsinneqaannarsinnaasut isumagisinnaavai" sorpassuarnik imaqarpoq.

Nassiussanik allanik imaluunniit suliassanik allanik suliarinninnissamik POST Greenlandip aalajangenera § 2-mi, imm. 2 naapertorlugu niuernermi piumasaqaatini nalinginnaasuni allassimasinnavoq, naak piumasaqaataanngikkaluarluni. Tamatumunnga pissutaavoq POST Greenland ilaanneeriarluni suliassanik allanik tigusisarnera, pingaartumik suliassanik aalaja-ngersimanagerisunik, taamaattumik Naalackersuisut naleqquttuursorinngilaat POST Greenlandip taamatut aalajangersakkanik tamanut saqqummiinissaanik pisussaaffilernissaa. Taamaaliortoqassagaluarpat niuernermi piumasaqaatit akulikitsumik allannqortittariaqartassapput asuli POST Greenlandimut suliakkersuutaasumik.

#### *§ 6-imut*

Nioqqutissanik eqqussuineq annissuinerlu pillugit nalunaarut, nioqqutissanik eqqussuineq annissuinerlu pillugit inatsisartut inatsisaat naapertorlugu aalajangersarneqartoq tunngavigalugu POST Greenland peqquneqarpoq nassiussanik nalunaarsuissasoq aammalu eqqussukkat nakkutiginerannut akitsuutillu akilersinniarnerrannut peqataassasoq, Akileraarnermut Pisortaqarfik suleqatigalugu tassannqalu ilitsersorneqarluni. Suliap ingerlannissaanut malitassat erseqqinnerusut nioqqutissanik eqqussuineq annissuinerlu pillugit inatsisartut inatsisaanni najoqqutassiani tassunga atasuni aalajangerneqarput.

POST Greenlandip poortukkat Danmarkip avataani nunanit toqqaannartumik nassiunneqartut imaluunniit Danmark aqputigalugu nassiunneqartut eqqunneqarnerannut nalunaarsuukkat immersorneqarsimasut Akileraarnermut Pisortaqarfimmut nassiutissavai, tak. nioqqutissanik eqqussuineq annissuinerlu pillugit inatsisartut inatsisaat.

Aalajangersakkami poortukkat nunanit allaniit toqqaannartumik imaluunniit Danmark aqqusaarlugu nassiunneqartut tamarmik pineqarput. Danmark aqqusaarlugu Atlantikoq qulaallugu Kalaallit Nunaannut attaveqaat maannarpiaq ataasiinnaamat timmisartukkat nassiussat tamarmik Danmark aqqusaarlugu nassiunneqartarput.

#### *§ 7-imut*

Aalajangersakkami erseqqissarneqarpoq Post Danmark A/S-ip Danmarkimi allakkerineq il.il. ingerlatarilersimagaa.

Aalajangersagaq manna aamma aqutigalugu siunnersuutip matuma nunat tamalaat akornanni aalajangersakkat akuerineqarsimasut akornanni pissutsinik, Kalaallit Nunaata nunap sumiissusia eqqarsaatigalugu sunniuteqartussatut sillimaffigineqanngitsunik naleqqussaaneqarpoq. Tassalu tassani pineqartoq kisimi tassaavoq, allakkat pillugit nunarsuaq tamakkerlugu isumaqatigiissutit, nunarsuarmi tamani allakkeriviit akornanni attaveqarnermut tunngaviliisoq. Allakkat pillugit nunarsuaq tamakkerlugu isumaqatigiissummut Danmark, taamaalillunilu aamma Kalaallit Nunaat, ilaavoq.

Namminersornerullutik Oqartussat pillugit inatsimmi (namminersornerunermut inatsit) nr. 577-imi, 29. november 1978-imeersumi § 10, imm. 1 naaportorlugu Namminersornerullutik Oqartussat pisussaaffiligaapput isumaqatigiissutit nunallu tamalaat akornanni malittarisassaasut allat naalagaaffimmik qaqugukkulluunniit pituttuisut malinnissaannut. Namminersornerunermut inatsimmi § 13 naaportorlugu isumaqatigiissutit taamaattut Namminersornerullutik Oqartussanut oqaaseqarfigeqqullugit saqqummiunnissaat naatsorsuutigineqarpoq.

#### *§ 8-mut*

Imm. 1-imut

Aalajangersakkap nassatarisaanik POST Greenland nassiussat ilaannut ingerlassinissamut kisermaassisussaavoq. Taassuma kingunerisaanik POST Greenland allakkanik, poortukkanik quppersakkanillu assigiimmik akeqartitsilluni aammalu pitsaalluinnartumik ingerlassinissaq qulakkiissallugu pisussaavoq. Kisermaassisussaataaernermini POST Greenlandip allakkerinermini inuiaqatigiinnut pisussaaffiligaanermini naammassinninnissaanut qulakkeerisinnaanermut pisariaqartinneqartut sinnerneqassanngillat.

Kisermaassisuunissaq killilerneqarpoq tassaassallunilu allakkat sunilluunniit imaqartut, taakku allakkat puuannut allakkalluunniit puuanut assingusunut ikineqarsimappata. Taamatut "allakkap puuanik piumasaqarneq" aamma sullissinerit nutaatut ineriartortinneqartut kisermaassinerimut ilaatinneqartutut isigineqarsinnaaneri pillugit paasinninnissamut aallaaviussapput. Piumasaqarnerup kingunerisaanik assersuutigalugu qaraasasiakkut allakkanut tunngasunut qaraasasiakkut allakkat naqitanngornerinut, allakkat poorneqarnerinut, qaatiguuliorneqarnerinut il.il. pillugit passussinermi tamanut ammaassinerimut ilaatinneqassapput. Akerlianilli ki-ngusinnerusukkut tunisassiat naammassisat allakkerivikkut ingerlassineq pillugu kisermaassisuunermut ilaatinneqassapput, tunisassiap inaarnera allagaappat qaatiguuliorneqarsimasoq.

Allakkanut qaatiguuliorneqarsimasunut ilanngullugit naatsorsuutigineqarput, imm. 1-ip nr. 1-ani ingerlassinerit taanneqartut saniatigut, allakkatigut nalunaarutit, soorlu postkortit, fakturat, fulgesedlit, imaatigut angallassinernut allagartat allallu allagartat



nassiussanut tunngassuteqartut inunntu ataasiakkaanut tunngasunik imaqartut ilanngullugit. Kisermaassisuunerup killilerneqarneranut piunasaqarnermut tapiliusseq pisariaqarpoq, taamaattoqanngippat nassiussat allakkat *puuanut* ikineqaratik assingusumilluunniit poortorneqaratik agguanneqalissagaluarpata nassiussat inunntu ataasiakkaanut tunngassuteqartut POST Greenland avaqqullugu ingerlanneqalersinnaammata.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsisoqarsinnaavoq.

Imm. 2-mut.

Ajornaatsuunissaa pissutigalugu, soorlu silap pissusia eqqarsaatigalugu, aalajangersakkami erseqqissatigineqarpoq katalogit, brochurit, aviisit allallu nassiussat qaatiguuliorneqarsimasut assigiiaartunik naqinneqarsimasunillu imaqartut poorsimatillugit aamma POST Greenlandiunngitsumit agguanneqarsinnaassasut. Taamaattoqassappat pisariaqarpoq taakku akimut ersittumik poortorneqarsimanissaat, soorlu plastfoliamik, akimut ersittumik puullit imai takuneqarsinnaatillugit nassiussisup inunntu ataasiakkaanut nalunaarutinik nassiussanilluunniit nassiussinissani nalinginnaasumik tunuarsimaarfigisinnaammagu. Tamannami aamma POST Greenlandip kisermaassisussaataitaneranut akerliussaaq.

Katalogit, brochurit, aviisit il.il. qaatiguuliorneqarsimasut nimerummik, qilerummik assigisaanilluunniit aalajangeruserneqarnissaat akuerineqarsinnaavoq, nassiussalli allakkatut poorneqarsimasutut tamanna isigineqaatigissanngilaat.

Imm. 3-mut

Aalajangersakkami naqissuserneqarpoq allakkanik nunatsinneersutut qaatiguuliorneqarsimasunut Danmarkimut tassanngaanniillu, Savalimmiunut tassanngaanniillu aammalu nunanut allanut nunanillu allaniit POST Greenland kisermaassisuulluni ingerlassisussaasoq.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsisoqarsinnaavoq.

Imm. 4-mut

Allakkanik ingerlassineq, tassa katersuineq, assartuineq agguassinerlu pillugu nassuiaam-mi pineqartuni pingasuni tamani kisermaassisuuneq pineqarpoq.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsisoqarsinnaavoq.

## § 9-mut

Imm. 1

Aalajangersakkap nassatarisaanik nassiussat POST Greenland avaqqullugu

ingerlanneqarsinnaapput, tamanna pineqartumut namminermt tunngasuuppat imaluunniit nassiussat ingerlatinneqartut nammineq atorfeqartitamut ingerlappata. Tassani assersuutigineqarsinnaavoq suliffeqarfik immikkoortortalik arlalinnilluunniit immikkoortartaqarfilik, nammineerluni taakku akornanni allakkanik ingerlassinernik isumagisaqartoq. Aningaaserivik aamma atorfeqartitsisinnaavoq aningaaseriviup inunnut kontoqartunut assigisaannullu aningaaseriviup nassiussaani inunnut aalajangersimasunukartunik agguuassisartussamik. Aviisinik saqqummersitsisartut pisartagaqartunut aammattaaq agguuassisinnaassapput, aatsaalli inummik aalajangersimasumik taamatut suliaqartussamik atorfinitsitsisimagunik. Paarlattuanik inerteqqutaavoq suliffeqarfiup allap imaluunniit inuup allarluiinnaap ingerlassisorinissaa, taamaattoq takuuk imm. 2.

Imm. 2

POST Greenland avaqqullugu ingerlassineq aamma ajornanngilaq alla sinnerlugu ingerlassineq pippat, ingerlassisorlu ingerlassinermut tassungarpiaq ilaannikkuinnaq ingerlassisartuuppat. Aalajangersagaq taanna malillugu suliffeqarfiup nammineq sulisumi napparsimanerani inuk sulisorinngisani piffissami sivikitsumi ingerlassisorisinnaavaa.

"Ilaannikkuinnaq" paasineqassaaq inuk allarluiinnaq pisartunik imaluunniit suliffeqarfiup i-ngerlassisarneranik aaqqissuussiffigineqarsimanngitsoq.

### *§ 10-mut*

Aalajangersakkap kingunerissavaa nassiussat POST Greenland avaqqullugu unioqqutitsinerunngitsumik ingerlanneqarsinnaanngornerat nassiussat tamarmik immikkut POST Greenlandip akigititai tungavigalugit ingerlatitsinermut pineqartumut kalaallit frimerkiinik atuuttunik pilerneqarsimappata, frimerkillu taakku kingorna pissusissamisoortumik atorsinnaajunnaartinneqassallutik taamaalillutik POST Greenlandimut atoqqinneqarnerminni isertitassatigut annaasaqaataasinnaajunnaarlugit.

Tunngaviusumik frimerkit ullulikkamik naqissuserlugit atorunnaarsinneqarsinnaapput, naqissut taamaattoq nassiussap qanga tiguneqarsimaneranut uppernarsaataassammat. Frimerki naqissuserneqarsimanngitsoq paasineqarpat, kuglepennimik, tuschimik assigisaanilluunniit nunguterneqarsinnaanngitsumik krydsilerlugu atorunnaarsinneqarsinnaavoq.

POST Greenland avaqqullugu nassiussanik ingerlassisarnissamut tunngatillugu suliffeqarfinnik allakkisartartunik namminersortunik pilersitsisoqarsinnaanera eqqarsaatigineqarsinnaavoq. Ingerlatseqatigiiffik taamaattoq allakkanik assartuinermt atatillugu allakkat pillugit siunnersuut manna naapertorlugu allakkanik frimerkiliisassaaq. Ingerlatseqatigiiffiit allakkisarnermik suliaqartut ataasiakkaat nassiussanik taamaattunik assartuinermik peqareenera ilimagineqarpoq, taakkuli amerlassusaat maannarpiaq annikitsutut nalilerneqarsinnaavoq.

## § 11-mut

Imm. 1-imut

Siunnersuut Kalaallit Nunaanni inatsisaasut tunngavigalugit Allakkat pillugit Nunarsuaq tamakkerlugu isumaqatigiissummut naleqqussarneqarpoq, tassani tunngavigineqarmata nunarsuaq tamakkerlugu allakkeriveqarnermi isumaqatigiissutaasut. Allakkat pillugit Nunarsuaq tamakkerlugu isumaqatigiissut Danmarkimit Kalaallit Nunaannillu peqataaffigineqarpoq.

Allakkat pillugit Nunarsuaq tamakkerlugu isumaqatigiissusiortartuusooq ukiut tallimakkaarlugit nunarsuaq tamakkerlugu ataatsimeersuartitsisarpoq, tassanilu ukiunut tulliuuttunut tallimanut siunertat suliaassallu aalajangersarneqartarput.

Allakkat pillugit Nunarsuaq tamakkerlugu isumaqatigiissut nunanit 189-init ilaasortaaffigineqarpoq, tamatuma kingunerisaanik isumaqatigiissut allangortiterneqangaarneq ajorpoq. Isumaqatigiissummi allannguutaasinnasut tassatuaasarput nunat ilaasortaasut sullissinerisa sukkatseriaatigisinnaasaat ajornartorsiutaasinnaasullu qaangiissutigisinnaasaat.

Allakkat pillugit Nunarsuaq tamakkerlugu isumaqatigiissutip nalunaarutaani 43-mi tunngavissinneqarpoq nunat ilaasortaasut allaffissornikkut nassiussanut ingerlateqqinneqartartunut tun-ngatillugu qanoq pisussaaffeqarnissaat. Allakkat ingerlateqqinneqartartut tassaapput allakkat nunani allanit Kalaallit Nunaanni agguaassassanngorlugit nassiunneqarsimasut, taamasilluni nassitsinermi akit appasinneruneri nunanullu allanut akiliuteqartarnerup tunoqquteriarnissaa iluanaarniutigalugit ingerlateqqitassiissutigineqarsimasut.

Siunnersuutip nassataanik POST Greenland nunatsinni nassiussanik qaatiguuliukkanik, nassiussisut Kalaallit Nunaanni najugaqartut nunami allami akit iluanaarnarnerusut iluaqutiginiarlugit tassani tunniussimasaanik imaluunniit tunniutsissimasaanik ingerlassissalluni agguaassissalluniluunniit pisussaataaangilaq. Tamanna allakkanik ingerlateqqitanik ingerlassinermik taaneqartarpoq.

Nassiussinermi akinik aamma nunarsuarmi allakkatigut sullisseqatigiinnermi nunat akornanni akiliisarnernik atorluaaniarluni allakkanik ingerlatitseqqinneq pasitsaanneqarsimassasoq piumasaqaataavoq. Allakkat ingerlateqqitat tassaapput, nassiussassat Kalaallit Nunaanni nassiunneqartussanngorlugit piareersakkat, tamatumalu kingorna killeqarfik qaangerlugu anninneqarsimasut, taamatullu allakkat nunami allami nassiunneqartussanngorlugit piareersarneqarsimasut. Allakkat nunatsinni tigusisussamut nassiunneqartuunissaat piumasaqaataavoq.

Allakkanik ingerlatitseqqittarnermut assersuutigineqarsinnaavoq, suliffeqarfik inunnilluunniit sullissivik Kalaallit Nunaanniittoq nassiussassanik nunatsinni tigusisussanut nunami allami naqiterititsisoq, kiisalu nioqqutissanik taakkuninnga nunami tassani nassiussassanngorlugit tunniussisoq. Tamatumanili nassiussassat

tamaani nunatsinni tiguisussanut qaatiguuliorneqanngippata nassiussanik ingerlatitseqqittoqassanngilaq.

POST Greenlandip allakkanik ingerlatitseqqinnermik pasinartoqarpat, tamanna qulakkeerniagassaraa nunatta iluani allakkeriveqarnerup assigiinnngitsunik akeqartitsinertigut atornerlunneqannginnissaa illersugassarigamiuk. Pasilliineq pilersarpoq uppersaatitalimmik qulakkeerneqaraangat allakkamik nassiussimasoq Kalaallit Nunaanni najugaqartuusoq, nassiussisuorlu nammineq aterminik atsiorsimasoq. Nassiussat Kalaallit Nunaanni najugalimmut nassiutsinneqarsimanersut allakkatut ingerlateqqitatut pasissallugit uppersarineqartarput, nassiussap imarisai Kalaallit Nunaanni najugalimmit nassiussaritinneqartuusaarsimagaangata.

POST Greenlandip pasilliineq qulaajareerpagu nassiussisoq allakkeriveqarfillu nassitsiviusoq allakkanik ingerlateqqitanik nassitsinnginnerinik aatsaat uppersasisitsisinnaalersarput.

Imm. 2-mut

POST Greenlandip, Allakkat pillugit nunarsuaq tamakkerlugu isumaqatigiisummi tamatumunnga maleruagassat malillugit nunanit allaniit allakkanik qaatiguuliukkanik, nassiussatut ingerlateqqitassatut pasinarsinnaasunik ingerlateqqinneqartussanik, tassunga ilaalluni aamma nassiussisup uppersaanissaa nassiussat ingerlateqqitassatut pasinartuunngitsut, nassiussisup akuersinera nunap iluani akimik atuuttumik akiliinissaminik, kiisalu nassiussat taakku nassiussisup nunap iluani akimik akiliiffigiumanngisai qanoq ilineqassanersut pillugit, qanoq annertutigisumik tiguisumangittassaneranut, Naalackersuisut nalunaarusiornermikkut sukumiinerusunik maleruagassiussapput.

Naalackersuisut POST Greenlandip allakkanik ingerlateqqitanik tiguisumangissinnaanera § 11, imm. 1-ikkut aqutissiuussinnaavaat, tamannali pinngitsoortinneqarsinnaavoq nassiussisoq allakkerivilluunniit Kalaallit Nunaanni agguaassasanik nassitsiviusoq uppersaasiisnaappat, allakkat kalaallit Nunaanni najugalimmit Kalaallit Nunaanni najugalinnut nassiussaanginnerinik, kiisalu allakkeriviup nassiussimasani nunatsinni allakkeriviit akigititaasa nalingat najoqqutaralugu nassiussimasani akilersinnaappagit, taamatulluunniit nassiussinissamut allakkerivillu isumaqatigiissutaasimasut nalingat nassiussimasup akilereerpagu.

### *§ 12-imut*

Aalajangersakkap nassatarisaanik POST Greenlandip ilisarnaataa Naalackersuisunit akuerineqarsimasoq Naalackersuisut akuersiteqqaarnagit allanit atorneqaaqusaanngilaq. POST Greenlandip ilisarnaatini suliffeqarfittut ilisarnaatigaa. Aalajangersagaq aqutigalugu POST Greenlandip allakkanik, nunap iluani tiguisussanut qaatiguuliukkanik ingerlassisarnermi kisermaassisussaataitaneranut maleruagassat akerlilerneqarput.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsoqarsinnaavoq.

#### *§ 13-imut*

Aalajangersakkap nassatarisaanik POST Greenland allakkanut nakkartitsisarfinnik ikkussuinissamut kisermaassisussaataavoq. Aalajangersakkami matumani allakkanut nakkartitsisarfik atuuffini tunngavigalugu nassuiaasiorneqarpoq, tassalu aqqusinerni annerni, aqqusiniinnarni imaluunniit allani kikkut tamarmik aqqutigisinnaasaanni allakkanut nakkartitsisarfinnik inissiinissamut POST Greenland kisermaassisuvoq.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsoqarsinnaavoq.

#### *§ 14-imut*

Aalajangersakkap nassatarisaanik POST Greenland frimærkinik saqqummersitsisarnissamut kisermaassisussaataavoq. Tassani siunertarineqarpoq, kisermaassisuusup aamma kortit, allakkat puussaat assigisaallu inuinnaat namminneq suliarisimasaat frimærkilersortassagai allatigulluunniit nassiussassanngorlugit akilerneqartutut naqissusertassagai.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsoqarsinnaavoq.

#### *§ 15-imut*

Aalajangersagaq allakkanik isertuussisussaataaneremut sulisullu nipangiussisussaataanerannik imaqarpoq. Aalajangersagaq aqqutigalugu POST Greenlandip sulisuisa aammalu § 20 naapertorlugu ingerlatitseqqinnermik isumaginnittuusut nipangiussisussaataanerat aalajangersarneqarpoq. POST Greenland-imi sulisut aammalu § 20 naapertorlugu ingerlatitseqqinnermik isumaginnittuusut inuit allakkeriviup kiffartuussiviinik atuinerat susassaqqanngitsunut nalunaarutigisussaannngilaat, imaluunniit susassaqqanngitsut paasisutissanik taamaattunik namminneerlutik pissarsiniarnissaannut periarfissittusaaanagit. Nipangiussisussaataaneq suliunnaareernerme imaluunniit isumaqatigiissutip atorunnaareernerani atuuttuassaaq.

Aalajangersakkamik unioqqutitsineq Kalaallit Nunaanni pinerluttulerinermut inatsimmi § 41 naapertorlugu akiliisitsoqarsinnaavoq.

### *§ 16-imit*

Aalajangersakkami nassiussat matoqqasut, POST Greenland-imit isumagineqartut apuunneqarsinnaanngitsullu, qanorluunniit ilioraluaaraanni nassiussisumut tiguisissamulluunniit tunniunneqarsinnaanngitsut ammarnissaannut misissornissaannullu periarfissiinissaq iluarsiivigineqarpoq.

POST Greenlandip sivisunerpaamik sapaatit akunnerinik marlunnik periarfisseereerluni nassiussamik ammaasinnaavoq misissuisinnaallunilu, piffissap taaneqartup iluani nassiussamik paasisitsisinnaasumik ujartuinermik tigusaqarsimanngikkuni. Allaffissorpeq eqqarsaatigalugu nassiussap inissiffissaaleqissutap ammarneqannginnermini uninngatinneqarnissaa sivikinnerpaaffilerneqassanngilaq.

POST Greenlandimi nassiussap nassiussisumut tiguisissamulluunniit apuunnissaanut paasissutissat naammassorineqanngippata, nassiussaq siunnersuummi § 23, imm. 1 naapertorlugu apuunneqarsinnaanngitsutut suliarineqassaaq.

Nassiussanik ammaasinnaanermut maleruagassiortussaataaneq Naalackersuisuniippoq, tamatumani innuttaasut tunngaviusumik inatsimmi § 72 malillugu illersugaasumik piginnittussaananerannut akulerunneq pineqarmat. Taamatut periarfissaqartitsineq naleqquttutut isigineqarpoq, tamanna pinngippat nassiussaq tiguisissatut qaatiguuliukkamut nassiussisumulluunniit apuunneqarsinnaassanngimmat. Taamaattumik Naalackersuisut isumaqarput suliani taamaattuni immikkut ittumik pisariaqartitsisoqartoq tunngaviusumik inatsimmi eqqartuussivimmit allagartamik peqqaarluni iliuuseqarsinnaanermik saneqqutsisinnaanermut.

Aalajangersakkami allakkat poortukkallu pineqarput. Poortukkat aalajangersakkamut ilaanerannut ilaatigut pissutaavoq, nalunaarut nalinginnaasumik allagaanani allatut aamma isikkoqarsinnaammat. Disketti nalunaarutilluunniit allat inunnut ataasiakkaanut tunngasunik imaqartut assersuutigalugu oqimaassusii angissusiilu apeqqutaatillugit poortukkatut nassiunneqarsinnaapput. Naalackersuisut ilaatigut nassiussat kimit ammarneqarsinnaanersut misissorneqarsinnaanersullu pillugit maleruagassat erseqqinnerusut aalajangersassavaat, tassunga i-lanngullugu allakkat imaannik isertuussisinnaanermut tunngasut, tak. siunnersuummi § 15.

### *§ 17-imit*

Aalajangersakkap nassatarisaanik POST Greenland niuernerminni piumasaqaatini nalinginnaasuni nassiussat qanoq issusissaat, nassiussat ataatsimoortukkaat amerlassusissaat kiisalu nassiussat ingerlateqqitassatut tiguneqarsinnaanerinut aningaasallu nassiussat allagartaat atorlugit nassiunneqarsinnaasut

amerlassuserisinnaasaannut piunasaqaatit pillugit maleruagassanik sukumiisunik aalajangersaassaaq. Maleruagassanik sukumiisunik aalajangersaanermi POST Greenland § 3-mi angallassinissamut pisussaaffimmik paasiuminaallisitsisisumik maleruagassiussanngilaq, soorlu angissusissamut oqimaassusissamullu piunasaqaatinik naapertuutinngitsunik aalajangersaassanani.

Aamma POST Greenland niuernermi piunasaqaatini nalinginnaasuni nassiussap qanoq ilineratigut ingerlateqqinneqarnissaata itigartitsissutigineqartarnissaanut maleruagassiussaaq. Nassiussat ingerlateqqinneqarnissamut itigartitsissutaasinnaasut tassaasinnaapput nassiussat siaruarternissamut inerteqqutaasunik, nerisassanik asiujasunik, timmissanik, uumasunik miluumasunik pulateriaarsunnillu imallit, nassiussat qaamikkut inerteqqutaasutut, assuarnartutut ajuallatsitsiniutitullu isikkullit, nassiussat ingerlanneqarnerminni inunnut atortunulluunniit il.il. ajoqusiisinnaasut imaluunniit ulorianaateqarsinnaasut annertuumillu akornusiisinnaasut. Uani nalunaarsukkani periarfissat tamakkerlugit oqaatigineqanngillat.

#### *§ 18-imut*

Aalajangersakkap nassatarisaanik POST Greenland piunaffigineqarnermigut poortukkanik, nassiussanik tammatsaalisani, nalingi nalunaarlugit nassiussanik kiisalu aningaasanik allakkerisarfikkoortillugit nassiussanik tiguisimanerminut uppernarsaammik tunniussissaaq. Tassuuna nassiussat ingerlateqqitassanngorlugit POST Greenlandimit tiguneqarnerat uppernarsaaserneqassaaq.

#### *§ 19-imut*

Aalajangersakkap nassatarisaanik POST Greenland niuernermi piunasaqaatini nalinginnaasuni nassiussisoq allakkanut tunniunneqareersunut nalunaarutigineqareersunullu qanoq annertutigisumik oqartussaaffeqarnersoq pillugu maleruagassanik aalajangersaassaaq. Tamatuma nassatarisaanik nassiussat ingerlateqqinneqareersimagaluarpata imaluunniit suli ingerlateqqinneqarsimangikkaluarpata nassiussisup nassiussaq utertinniarlugu imaluunniit nassiussap inummit tiguisissamit allaanerusumut tunniunneqarnissaanik piunasaqarsinnaanera pillugu aalajangersaasoqassaaq. Maleruagassatut atorneqarsinnaavoq, nassiussaq allakkerivimmit nassiunneqarfissaminit suli qimagussimatinnagu nassiussisumit tamakkiisumik qanoq iliorfigineqarsinnaanera. Nassiussap allakkerivik nassiunneqarfissani qimareersimappagu POST Greenland aalajangiisussanngortussaavoq nassiussisoq qanoq atsigisumik iliuuseqarsinnaanersaq.

#### *§ 20-mut*

#### Imm. 1-imut

Aalajangersakkami erseqqissarneqarpoq, assartuisartut aqquataanni allakkanik ingerlassinerit pillugit POST Greenlandip allakkanillu ingerlatassanik angallassisartut akunnerminni qilersorsimannngitsumik isumaqatigiissusiorsinnaanerit pingaarnertut malinneqassasoq, tamannalu POST Greenlandimik TELE Greenland A/S-imut suliassamik tunniussinerup nassatarisaatut naapertuuttutut isigineqarpoq. POST Greenland ingerlassinerit tamatumunnga isumaqatigiissutaasut malillugit akiliissaaq.

#### Imm. 2-mut

Pissutsit immikkut ittut peqquataallutik pisariaqartinneqalerpat, aammalu POST Greenlandip piumasaqartoqarneratigut Kalaallit Nunaanni imaluunniit Kalaallit Nunaanniit Danmarkimut, Savalimmiunut nunanulluunniit allanut aalajangersimasumik ingerlassisuusoq, siumut utimullu aqputigisamiittunit allakkerivinnit paarlaateqatigiiffinniluunniit nassiussassat ingerlannissaannut pisussaaffimmut ilaatinneqartut ilanngullugit tiguneqarnissaat pillugit Naalakkersuisut aalajangersinnaapput. Naalakkersuisut Air Greenland A/S, Air Alpha Greenland A/S, Arctic Umiaq Line A/S aamma Royal Arctic Line A/S assartuisartullu allat ingerlaffigisartakkaminni allakkanik nassataqartarnissaannik piumaffigisinnaavai.

#### Imm. 3-mut

Naalakkersuisut piginnaatinneqassapput allakkanik angallassinermut malittarisassiornissamut, tassunga ilaassallutik allakkat nassiussanit allanit pingaarnertutinnegarnissaat, akiliinissaq kiisalu allakkat angallanneqarneranni kina akisussaasutut inissisimansoq. Malittarisassaq pingarneq tassaavoq qilersorsimannngitsumik isumaqatigiissusiornissaq, tamannalu Naalakkersuisut angallassinermut akilerneqarnissaata aalajangersarneqarnerani eqqarsaatigisariaqarpaa.

POST Greenland angallassinermut akiliissaaq.

### *§ 21-mut*

Aalajangersakkap nassatarisaanik POST Greenland niuernermit piumasaqaatini nalinginnaasuni nassiussat tunniunneqartarnerannut aalajangersakkanik sukumiisunik aalajangersaasin- naavoq, tassunga ilaallutik nassiussat suut allakkanik issoraavinnut immikkoortiterneqartassanersut, nassiussat suut allakkerivimmut aaneqartassanersut aamma illunut agguassinermit piumasaqaatit minnerpaaffissaat.

### *§ 22 pillugu.*

#### Imm. 1-imut

Naalakkersuisut ilaqtariit ataasiakkaat illuinut illunullu uiguleriinnut allakkanik



nakkaatitsivilersuinissamut, kiisalu inissiarsuarni quleriinni allakkanik issoraaveqarfilersuinissamut maleruagassanik aalajangersaassapput, tassunga ilaallutik allakkanik issoraaveqarfilersuinernut aamma allakkanik nakkartitsivilersuinernut, atorneqarnerinut, sumut inissinneqarnissaannut, qanoq inissinneqarnissaannut kiisalu allakkanut nakkaatitsiviit matukkullu nakkartitsiviit angissusissaannut piumasaqaatit.

Imm. 2-mut

Inoqutigiinni pissutsit pissutaallutik POST Greenland allakkanik tunniussisinnaanngippat, Naalackersuisullu allakkanik issoraaveqarfilersuinernut, allakkanik nakkartitsivilersuinernut matukkullu nakkartitsivinnut malittarisassiorsimallutik, POST Greenlandip inoqutigiit taakku allakkanik aatsiviginngitsoorsinnaavai. Taamaattoqarpat allakkat sivikinnerpaamik sapaatip akunnera ataaseq allakkerivimmi aaneqarnissaminnut uninngatinneqassapput.

### *§ 23-mut*

Aalajangersakkap nassatarisaanik POST Greenland niuernermi piumasaqaatini nalinginnaasuni nassiussat inissiffissikkuminaatsut suullu inissiffissikkuminaatsut nassiussaneersut qanoq pineqartarnissaannut maleruagassanik aalajangersaassaaq, tassunga ilaatinneqassalluni suna pissutigalugu nassiussat apuunneqarsinnaannginnersut.

Assersuutigalugu makku pissutaallutik nassiussat apuunneqarsinnaasanngillat: Tigusiumasoqanngilaq, tiguisusaaq aallarsimavoq, qaatiguuliornera amigarpoq, tiguisusaaq najukkami ilisarimaneeqanngilaq il.il.

Aamma POST Greenland niuernermi piumasaqaatini nalinginnaasuni erseqqissaateqassaaq, nassiussat apuunneqarsinnaanngitsut qanoq iliuuseqarfigineqartassanersut.

Nassiussaq apuunneqarsinnaanngitsutut nalunaarsorneqassaaq, nassiussaq tiguisusamut tunniunneqarsinnaanngippat, siunnersuummili malittarisassani § 16 naapertorlugu allakkanik ammaasinnaanermut piumasaqaat atorneqassaaq, POST Greenlandip tiguisusaaq nassiussisorluunniit nassaarisinnaanngippagu. Nassiussat qanoq ilinerani apuunneqarsinnaanngitsutut isigineqassanersut allakkanik ammaasinnaanermut maleruagassat akerlianik aalajangersaasinnaanermut piginnaatitaassut POST Greenlandimiippoq, tamatumani innuttaasut piginnittussaananerannut akulerunneq pineqanngimmat.

POST Greenlandip nassiussat nioqqutissanik eqquteqqusaanngitsunik imaqartut imaqarsorinartulluunniit, tamakkununga ilanngullugit nioqqutissat akileraarusigassat kukkunikkut akileraaruserneqarsimanngutsut, oqartussaasunut, nioqqutissanik eqqussuisarneq annissuisarnerlu pillugu Inatsisartut inatsisaat naapertorlugu tamakkuninnga sulialinnut tunniunnissaat isumagissavaa.

Aalajangersakkap tamatuma nassatarisaanik nioqqutissat kisermaassiffiusut, soorlu cigarettit, tupat, viinnit imigassallu aalakoornartut allakkerisarfinni ataasiakkaani uninngatinneqassapput, Akileraarnermullu Pisorta qarfik kalerrinneqassalluni. Tamatuma kingorna suliassat Akileraarnermut Pisorta qarfimmit isumagineqassapput. Ikiaroorartunik ilaqarpata taakku politiinut tunniunneqassapput.

#### *§ 24-mut*

Aalajangersakkami erseqqissarneqarpoq, immersugassat allakkeriviup allakkanut isumaginiffiani atorneqartut frimerkinillu nipitsivigineqarsimasut POST Greenlandip pigigai.

Immersugassat tassaapput pappiaqqat poortukkanut ilanngussat, adressekortitut isikkullit POST Greenlandip nammineq ilumini sulinermini atortagaatut isigineqartariaqartut malaarutiginninnernut ujarlernernullu atorneqartussat.

Immersugassani taamaattuni nassiussap nalingata angeqqataanik frimerkimik nipititsisoqassaaq, taamaattullu tasaanerusarput poortukkat. Immersugassaniit frimerkit taakku peeqqusaanngillat.

#### *§ 25-mut*

Imm. 1-imut

POST Greenlandip allakkerinermi suliassanut akit aalajangersasavai.

Tunngaviusumik akit aningaasartuutitut matussutaasinnaasunngorlugit, taamaalillunilu POST Greenland aningaasalersuutissanut nalikilliliinissanullu pisariaqartunut akiliisinnaanngorlugu aalajangersarneqassapput.

Akit sullitanit tamanit takuneqarsinnaassapput, soorlu allakkerivinni tamani pissarsiarineqarsinnaallutik saqqumitinneqartussanik naqitanik quppersagaliornikkut. Aamma akit allannguutaat atuutsinneqalinnginnerini tusagassiorfitsigut saqqummiunneqartassapput.

Imm. 2-mut

Nassiussat assartuisussaataitanerme pineqartut, Kalaallit Nunaata iluani, Savalimmiunut imaluunniit Danmarkimut nassiunneqartut, siunnersuummi § 3, imm. 1, nr. 1 – 3-mi naatsorsorneqartut akiinut aalajangersarneqartunut Naalakkersuisut akuersissuteqassapput. POST Greenlandip Danmark aamma Savalimmiut nunatut allatut taaguuserpaat, tamatumalu kinguneraaa Naalakkersuisut nunanut allanut akit aamma akuersissutigisarmatigit.

Kalaallit Nunaanni najugaqarfiit ataasiakkaat nunap iluani inissisimanermikkut angissutsimikkullu siammasinnerat pissutigalugu, Kalaallit Nunaanni sumiiffinnut

tamanut poortukkanik nassiussuisarnermut aningaasartuutit assigiinngitsorujussuupput. Taamaattumik iluarsiissuteqartarneq niuernermi akinik pilersitsisarnermut malinnaatiinnassallugu naapertuussinnaanngilaq. Naalakkersuisut poortukkat akiinut akuersissuteqartarnermikkut Kalaallit Nunaanni sumiiffinnut tamanut poortukkanik nassiussinermut akit naapertuuttumik annertussuseqartinneqarnissaat sinnerlugu akeqartinneqanninnissaannik qulakkeerinissamik periarfissinneqassapput.

Imm. 3-mut

Nunatsinni sumiiffimmiit sumiiffimmut tappiitsunut nassiussat angallanneqarnerat akeqannngilaq. Tappiitsunut nassiussat eqqarsaatigalugit uuttuutissanut, oqimaassusissanut aammalu angissusissanut POST Greenlandip aalajangersagai naammassineqarsimassapput. § 2-mi imm. 1 naapertorlugu, piumasaqaatit niuernermi piumasaqaatini nalinginnaasuni tamanit takuneqarsinnaassapput.

#### § 26-mut

POST Greenland akiliutissat naatsorsorneqartarneranut aalajangersaassaaq, imaappoq akit eqqarsaatigalugit nunat qanoq inissinneqassanersut. Akinik aaqqiussuussineq maanna imaappoq: Kalaallit Nunaat, Europa nunallu allat sinneri, taamaammat akiliutit assigiinngitsut atuupput.

POST Greenland frimærkilersueriaasissamik malittarisassaliussaaq, tassa imaappoq POST Greenland malittarisassaliussasoq frimærkilersueriaaseq qanoq ittoq atorneqassanersoq (frimærkit imaluunniit frankomik naqitsinermik), frimærkilersuutip frimærkimik naqitsinermik qanoq atorneqarnissaa aammalu frankomik naqitsinissamat piumasaqaatit (Port Pay).

POST Greenland frimærkiliussanut akiltsuutillu akilernissaannut malittarisassaliussaaq. Tamanna isumaqarpoq, POST Greenland malittarisassaliussasoq qaqugukkut frimærkit atorneqassanersut aammalu qaqugukkut aningaasanik akiliisoqartassanersoq. Aningaasanik ikisinernut kortit atorlugit akiliinernut assersuutigalugu akitsuut aningaasanngorlugu akileqquneqartassaaq. Akitsuut taanna frimærki atorlugu akilerneqarsinnaanngilaq.

#### § 27-mut

POST Greenlandip niuertarfinnit frimærkinik pisiniarfinnit tunisaqartarnissamat maleruagassat erseqqinnerusut aalajangersassavai, tassunga ilaassapput akikillisaanerit pillugit, niuertarfiit minnerpaamik tuniniaasinnaanernerannut tunngasut pillugit, frimærkip ataatsip qanoq akeqartinneqarnissaanut, atornerluisoqarneranut, allagartalersuinernullu malittarisassat il.il.

Frimerkinik niuertarfinnut tuniniaanermi malittarisassat suliffiup iluani ilitsersuutini aalajangersarneqassapput, niuernermi piumasaqaatini tamanut ammasuni inissisimanatik.

#### § 28-mut

Imm. 1-imi erseqqissarneqarpoq, aningaasanik allakkerivikkut nassiussanik ingerlassisussaataitaanermilu kinguaattoorutitut taarsiisoqarneq ajortoq. POST Greenland niuernerne kinguaattoorutitut taarsiineq ajorpoq.

Sullissineq malittarisassat malillugit naammassineqarsimasutut isigineqartarpoq, aningaasat nassiussalluunniit tiguisussamut eqqortumut akilerneqarsimappata tunniunneqarsimappataluunniit, tamatumani kukkusumik inissiineq imaluunniit kukkusumik tunniussineq pisimagaluarpat, taamaalillunilu kinguaattoorneq pisimagaluarpat.

Imm. 2-mut

Imm. 2-mi erseqqissarneqarpoq, ingerlassisussaataitaanermut ilaasunik nassiussanut tammartunut ajoquserneqarsimasunullu piffissami tiguneqarneraniit tunniunneqarnissaasa tungaannut Post Greenland qanoq annertutigisumik akisussaaffeqarnersoq.

POST Greenlandip nassiussaq POST Greenlandimit isumagineqarnerata nalaani akisussaaffigaa, tassalu nassiussap tiguisussamut eqqortumut akilerneqarnissaata tunniunneqarnissaatalu tungaanut.

Imm. 3-mut

Angallassinissamut inatsisitigut tunngavissat nalinginnaasut naapertorlugit pisut siumut naatsorsuutigereersimanngisat imaluunniit nassiussisup sumiginnaanera akisussaataaanninnissamut tunngavissanut ilaatinneqarput.

Aalajangersakkami killormut uppersarsaasoqarsinnaanera ilaavoq, taamaalilluni akiussaaneq taamaallaat pinngitsoortinneqarsinnaalluni POST Greenlandip uppersarsarsinnaappagu nassiussisooq kukkussuteqarsimasooq imaluunniit erseqqinngitsumik paasissutissiisimasooq, imaluunniit pisoqarsimappat siumut naatsorsuutigineqarsinnaasimanngitsumik.

#### § 29-mut

Imm. 1-imut

Aalajangersakkami erseqqissarneqarpoq allakkanut nalinginnaasunut taarsiissuteqartoqarsinnaanngitsooq, nassiussinermi akiliummik utertitsisinnaaneq tassunga ilaalluni.

Allakkat nalinginnaasut ataatsimut ukununga taaguutaapput allakkanut A-nut (timmisartukkut), allakkanut B-nut (umiarsuakkut) aamma tappiitsunut nassiussanut, nassiuseriaaseq immikkut ittoq atorlugu nassiussaangitsunut. Allakkanut nalinginnaasunut nassiuseriaatsimik immikkut ittumik "nalilittut" imaluunniit "tammatsaalisatut" ilisarnaatilittut nassiussanut taarsiisoqartarpoq.

Imm. 2-mut

Poortukkat nalinginnaasut tammartut ajoqusersimasulluunniit, imaluunniit imaat tamakkiisumik ilaannakuusumilluunniit annaaneqarsimasut, aningaasat taarsiissutissat amerlanerpaaffilerneqarsimasut iluanni taarsiiffigineqassapput, amerlassusissaallu nalinginnaasumik niuernerminni piumasarisaasut malillugit POST Greenlandip annertussusilissavai.

Poortukkat nalinginnaasut tassaapput ataatsimut taaguuteqartut poortukkatut immikkut ittumik "nalilittut" nassiuseriaaseq atornagu nassiunneqartartut. Taarsiissutissat aningaasartassaat sillimmasiinerminni taarsiissutissat annerpaaffissaatut annertussuseqarsinnaavoq niuernerminni piumasaqaatini nalinginnaasuni aalajangersarneqarsimasutut. Nassiussap annerusumik aningaasartalerlugu sillimmaserneqarnissaa kissaatigineqarpat, nassiuseriaaseq immikkut ittoq atorneqartariaqarpoq.

### *§ 30-mut*

Allakkat poortukkallu nalillit tammartut, ajoquserneqartut imaluunniit imaannik tamakkiisumik ilaannakuusumilluunniit annaasaqarfiusut annerpaamik naliliunneqartoq tunngavigalugu taarsiiffigineqassapput, taakku imaat naliliunneqartutut nalunaarutigineqartumit annertunerusumik naleqaraluarpataluunniit.

Nassiussat nalingi nalunaarsorlugit nassiunneqartut (allakkat aamma poortukkat nalillit) tassaapput nassiussat, nalingi qaatiguuliiffiusup nalaani kisitsisit naqinnerillu atorlugit koruuninngorlugit oorinngorlugillu allanneqartut. Naligititaasutut allanneqarsinnaasup annerpaaffissaa niuernerminni piumasaqaatini nalinginnaasuni aalajangersarneqarpoq.

### *§ 31-mut*

Allagaq tammarnaveequserneqarsimasooq tassaavoq allakkerivimmut tunniunneqarnermini tunniunneqarsimaneranut uppernarsaasigaq nassiussa qiguisissamuinnaq imaluunniit taassuma akuersissumminik tunillugu piginnaatitaanut tunniunneqartussanngorlugu, aammalu nassiussa allakkanut nalilinnut ilanngullugu angallanneqassasoq.

Allakkamik tammarnaveeqquserneqarsimasumik tammartoqartillugu, taarsiissutissamik nalinginnaasumik atugassatut annertussilikkamik, POST Greenlandip niuernermi piumasagaatini nalinginnaasuni aalajangersarsimasaanik annertussusilerlugu taarsiisoqassaaq.

Allakkamut tammarnaveeqqusikkamut ajoquserneqartumut imaluunniit imaanik tamakkiisumik ilaannakuusumilluunniit annaasaqarfiusumut ajoqusikkat imaluunniit amigaataasut nalinginik taarsiisoqassaaq. Nassiussap imaa qanorluunniit naleqaralarpat, taarsiissutissaq sillimmasiissutissatut annerpaaffiliussa, niuernermi piumasagaatini nalinginnaasuni aalajangersarneqartoq malillugu annerpaaffilerneqassaaq.

### *§ 32-mut*

Aviisinut ullormut, sapaatip akunneranut qaammammullu saqqummertartunut kiisalu atuagassianut taarsiisoqarneq ajortoq aalajangersakkami erseqqissarneqarpoq. Tamatumunnga tunngavigineqartoq ilaatigut tassaavoq nassiussanut taakkununnga appasissunik nassiussinermi immikkut akeqartitsineq, tassalu allakkat nalinginnaasut akiat akigitinneqanngimmat. Aamma nassiussat allakkatuinnaq isigineqartarput, taakkunungalugu taarsiissuteqartoqarneq ajorpoq. Allakkanut nalinginnaasunut taarsiisitsinissamut periarfissaqarnissaq kissaatigineqarpat, tamatumunnga immikkut ittumik akiliisitsisoqassaaq, tassalu nassiusseriaaseq immikkut ittoq atorneqassaaq, soorlu nassiussatut tammarnaveeqqusikkatut imaluunniit nalilittut angallassisoqarnissaanut.

### *§ 33-mut*

Imm. 1-imut

Aalajangersakkami erseqqissarneqarpoq, Nunarsuaq tamakkerlugu allakkat pillugit isumaqatigiissummi malittarisassat malillugit taarsiisoqartartoq. Nunarsuaq tamakkerlugu allakkat pillugit isumaqatigiissummut nunat 189-it ilaapput taassumalu nunani killeqarfii aqqusaarlugit allakkanik nassiussinermi aqqiivigisimavai allakkat sukkannerusumik ajornannginnerusumillu ingerlanneqarsinnaanngooqullugit.

Nunat taama amerlatigisut malittarisassanik isumaqatigiisuteqartariaqarnerat pissutigalugu, Nunarsuaq tamakkerlugu allakkat pillugit isumaqatigiisut minnerpaamik isumaqatigiisuteqarfiuvoq, ima paasillugu, malittarisassat tassani pineqartut nunat minnerpaamik malissagaat, aamma taarsiinissamut malittarisassiat ilanngullugit. Isumaqatigiisut malillugu suliarineqarput nassiussanut akisussaassuseqarnermik killiliussat assigiissaakkat nunat killeqarfii apeqqutaatinnagit nassiunneqartut.

Allakkat pillugit nunarsuaq tamakkerlugu isumaqatigiissummi immikkoortoq 34-mi aamma 35-mi nunat ilaasortaasut akunnerminni taarsiiffigeqatigiinnissamut

akisussaaffeqarnerat iluarsivigineqarpoq. Allakkat pillugit nunarsuaq tamakkerlugu isumaqatigiisummi tunngavissat pingaarnertit ukuupput:

Nunat ilaasortaasut nassiussanik tammartunik imaluunniit nassiussanik tammarnaveequsikkanik, poortukkanik nalinginnaasunik allakkanillu sillimmasikkanik taarsiisussaataasut pingaarnertit inissisimasarput, taakku nassiussanut taamaattunut maleruagassat naapertorlugit tunniunneqarnissaasa tungaanut.

Nunalli ilaasortaasut taarsiisussaataaassanngillat, pisut siumut naatsorsuutigereersimanngisat, nassiussisup tungaaniit kukkuneq sumiginnaanerluunniit imaasaluunniit suunerat pissutaappata imaluunniit nassiussisup nassiussap nalerpiaanit anginerusumik peqquserluuteqarluni sillimmasiisimanagera tamatumunnga pequtaasimappat.

Imm. 2-mut

Kalaallit Nunaanniit nunanut allanut, Danmarkimut imaluunniit Savalimmiunut nassiussaq POST Greenlandimit isumagineqarnermi nalaani tamarparat ajoquserneqarpalluunniit, imarisaaluunniit tamakkiisumik ilaannakuusumilluunniit annaaneqarsimappat, nunap iluani nassiussinernut maleruagassat malillugit nassiussisooq taarsiiffigineqarsinnaavoq, tamanna nassiussisumut iluaqutaanerussappat, taamaalillunilu siunnersuummi § 35-imi naatsorsueriaatsimut aalajangersakkat malillugit taarsiisoqarluni.

Allakkat tamarmik nunat killeqarfiinik aqqusaarisut "Office og Exchange"-mik (OE) taaneqartartut atorlugit ingerlateqqinneqartarput, taakku nunat akornanni isumaqatigiisutit aalajangersimaqqissaartut tunngavigalugit atorussanngortinneqartarlutik. Nalinginnaavoq allakkeriveqarfiit allakkanut akisussaasuusarnerat, soorlu angallanneqarnerannut, allakkat OE-tut isumaqatigiisutaasunit tiguneqarnissaasa tungaannut. Allakkat Kalaallit Nunaanneersut tamarmik Danmarkimik aqqusaarinnittussaapput. Danmarkimut nassiussat, tamatuma ataaniillutik Savalimmiut aamma nunat allat, silaannakkut allakkanik angallassineq eqqarsaatigalugu Kastrup-imi OE-qarput, Aalborg-ili tassaalluni umiarsuakkut nassiussanut OE-qarfiusoq. Nassiussaq ersittumik ajoquserneqarsimappat, imaluunniit ersittumik uppernarsineqarsinnaappat imarisaa tamakkiisumik ilaannakortumilluunniit annaaneqartoq, tamanna OE-qarfimmi paasineqassaaq, tassungalu POST Greenland akisussaavoq.

Imm. 2-mi aalajangersagaq nassiussisumut taarsiissuteqartarnermut tunngasuvoq, taannalu nalinginnaasumik tassaassaaq taarsiiffigineqarnissamut pisinnaatitaaffeqartoq. Uppernarsaasuunissamut apeqqut taamatut suliaqartuniippoq, allakkeriviit suliamut attuumassuteqartut akornanni oqaloqatigiinnerit aallarnerneqartarlutik. Periaaseq tamanna tunngaveqarpoq nassiussat amerlaqisut nunat killeqarfii arlaqaqisut aqqusaartarmatigit, taamaalilluni akisussaasup inissinnissaa ajornakusoortittarlugu. Nalinginnaavoq nuna nassiussiffiusoq taarseeqqaartarluni. Nuna tigusiffiusoq akisussaaffimminik unioqqutitsisimappat nuna nassiussiffiusoq taarsiissutigineqartut aningaasartaannik akilertariaqarsimasaminik nunamut tigusisumut taarsiisitsisinnaavoq.

Uppernarsaasuunissamut apeqqut tassani POST Greenlandimiippoq nunatut nassiussiffiusutut.

POST Greenland nalinginnaasumik nassiussanut akisussaajunnaassaaq, nunap pineqartup iluani aalajangersakkat naapertorlugit tunniussineq pisimappat, aammalu tiguisussap eqqortup piunasaqaatitaqanngitsumik nassiussaq tigoreerpagu.

Akisussaaneq ingerlaannassaaq nassiussap tunniunneqarnissaa sioqqullugu tunniunneqarneraniluunniit ajoqusersimasoq imaluunniit imaanik tilliffigitissimasoq paasineqarpat. Allakkanut nalilikkanut tiguisoq allakkamik tiguisimatsiarnermini akerliliisimatillugu akisussaaffik ingerlaannassaaq, tamatumani ajoqusiineq tunniussinissaq sioqqullugu pisimasoq uppersarneqarsinnaappat.

Imm. 3-mut

Nunanit allanit, Danmarkimit imaluunniit Savalimmiunit Kalaallit Nunaannut nassiussinermi, nassiussaq POST Greenlandimit isumagineqarnermi nalaani ajoquserneqarpat tiguisussaq nunap iluani nassiussinernut maleruagassat malillugit taarsiiffigineqarsinnaavoq, tamanna nassiussisumut iluaqutaanerussappat.

Allakkat tamarmik nunat killeqarfiinik aqqusaarisut "Office og Exchange"-mik (OE) taaneqartartut atorlugit ingerlateqqinneqartarput, taakku nunat akornanni isumaqatigiissutit aalajangersimaqqissaartut tunngavigalugit atorussanngortinneqartarlutik. Nalinginnaavoq allakkeriveqarfiit allakkanut akisussaasuusarnerat, soorlu angallanneqarnerannut, allakkat OE-tut isumaqatigiissutaasunit tiguneqarnissaasa tungaannut. Nunanit allanit, Danmarkimit imaluunniit Savalimmiunit umiarsuakkut nassiussanut Nuuk "Office og Exchange"-iuvoq. Timmisartukkut nassiussanut OE-t arlaliupput, pingaernerilli tassaallutik Kangerlussuaq aamma Narsarsuaq. OE-nut taakkununga POST Greenlandimi allakkat tunniunneqarnissaasa tungaannut Post Danmark A/S allakkanut akisussaasuvoq (allakkat tamarmik Danmark aqqusaartussaavaat). POST Greenlandip taamaalilluni nassiussanut akisussaaneq tigussavaa namminneq "Office of Exchange"-ni atorlugu.

Nassiussaq POST Greenlandimit isumagineqarnermi nalaani ajoquserneqarpat, siunnersuummi § 35-mi naatsorsueriaaseq malillugu POST Greenland ajoqusikkamut taarsiissaaq.

"Office of Exchange"-mi paasineqarpat nassiussaq ajoqusersimasoq, nassiussaq POST Greenlandimit tiggummineqarsimassanngilaq, taamaattumillu nunap iluani nassiussanut malittarisassat malillugit taarsiissutissiisoqarsinnaanani. "Office of Exchange"-mili paasineqarpat nassiussaq ajoquserneqanngitsoq, nassiussamillu tiguisup paasippagu nassiussap poortornera ajoqusersimasoq POST Greenland nunami malittarisassat naapertorlugit taarsiissaaq, nassiussaq aamma ajoquserneqarsimappat.

Aalajangersagaq nassiussanut ajoqusersimasunut taamaallaat atuuppoq. Imm. 2-p oqaasertaliorneqarneranut naleqqiullugu assigiinngissut siunertaqartinneqarpoq,



aalajangersagaq taanna tiguisussamut, nassitsisumuunngitsorli taarsiissuteqarnissamut tunngasuummat, tak. imm. 2.

§ 34-mut

Aalajangersaq malillugu aningaasat nassiussat allagartaat atorlugu nassiussat aatsaat iluamik akilerneqarsimassapput aningaasat piginnittuimmut akilerneqarpata.

Aningaasat nassiussat allagartaat atorlugit nassiunneqartut allakkerivimmit kukkusoqarneratigut tiguisussamut kukkusumut tunniunneqarsimappata, POST Greenland taarsiisussanngortinneqassaaq.

Assersuutigineqarsinnaasut tassaasinnaapput piginnaatitsissummik sallulluni atuineq, imaluunniit immersugaq tillinneqarsimasoq atorlugu aningaasanik nassitsineq, taamaalillunilu tiguisussaataaangitsumit aningaasanik tigusineq (peqquserlulluni atsiornikkut).

Assersuutini taaneqartuni POST Greenland aningaasanik tiguisussamut eqqortumut taarsiisussaataavoq, tamatumani aningaasanik akiliisup aningaasanillu tiguisussap tungaanniit kukkusoqarsimanagera sumiginnaasoqarsimanageraluunniit uppersarneqarsinnaanngippat. Aammattaaq aningaasanik allakkerivikkut nassiussinermi immersugaq ingerlanneqarnermi nalaani tammarsimappat taarsiisoqarnissaanik piumasaqartoqarsinnaavoq.

Aningaasanik allakkerivikkut nassiussinermi akiliutaasunut taarsiissuteqartoqassappat, aningaasat akilerneqarsimanagerat uppersarneqarsinnaassaaq. Tamanna allakkerivimmut uppersaammik atuuttumik takutitsinikkut pisinnaavoq imaluunniit akiliutaasup akilikkat nalunaarsorsimaffianni takuneqarsinnaasariaqarpoq.

Pisuni immikkorluinnaq ittuni aningaasat allakkerivimmit uppersarneqartut periutsit malillugit POST Greenlandimut akilerneqarsimangersut pillugu nalornisoqalersinnaavoq. Taarsiisussaataanerup atorneqarsinnaaneranut tamanna piumasaqaataassaaq. POST Greenland uppersaataip atuuttuunera apeqqusersinnaavaa, aningaasat akilerneqarsimanngitsutut qulakkeerlugit uppersarneqarsinnaappata.

Aningaasat naatsorsuutinut ilanngunneqarsimannginnerat tamatumani naammanngilaq. Nalinginnaasumik sumi kukkusoqarsimangersoq qulakkiivillugu uppersarneqarsinnaassaaq, assersuutigalugu sullitaq uppersaammik nassiussinissamullu immersukkamik tigumiaqartillugu. Kisiannili kukkuneq qanoq pilersimangersoq annikitsunnguamilluunniit nalornissutigineqalerpat, POST Greenland taarsiisussaataaasutut inissisimatillugu aningaasat taarserneqassapput.

Akiliisup aningaasanilluunniit tiguisussap tungaanniit kukkusoqarsimappat sumiginnaasoqarsimappalluunniit POST Greenland taarsiisussaataaassanngilaq.

Aningaasanik tiguisussap tungaaniit kukkuneq pisinnaavoq, assersuutigalugu aningaasat allakkerivikkut nassiussat immersorneqarfianni uppersaammilu aningaasartaritinneqartut assigiinngikkaangata. Taamatut pisoqartillugu kukkuneq aningaasanik tiguisussap tungaaniit kukkunerusarmat, POST Greenland nalinginnaasumik taarsiisussaataasutut isigineqarsinnaangilaq. Kukkuneq aningaasanik tiguisussamiimmat pisuni taamaattuni POST Greenland taarsiisussatut isigineqarsinnaangilaq. Taamatulli pisoqartillugu aningaasat akilerneqartut aningaasartaasa allanneqarnerisa assigiinnginnerat takkuitsorneqarsimappat tamanna POST Greenlandip tungaaniit kukkunerussaaq, POST Greenland sulisitsisutut sulisut kukkusaannut akisussaasuummat.

Aningaasat allakkerivimmi nassiussat immersorneqarfianni uppersaatitullu tiguisassami aningaasat allassimasat assigiinngissimappata, taamalu sullitap aammalu POST Greenlandip tamanna takusimanagu, tamatumani POST Greenland akisussaassaaq, taanna sulisitsisutut sulisumi kukkuneranut akisussaammat.

#### *§ 35-mut*

Aalajangersakkami taarsiissutissap annertussusissaa iluarsivigineqarpoq. Allagaq poortugarluunniit naliligaq POST Greenlandimit isumagineqarnermi nalaani tamarpat ajoqusersimappalluunniit, imaluunniit imai tamakkiisumik ilaannakuusumilluunniit annaaneqarsimappata, POST Greenland ajoqusikkamut taarsiissuteqassaaq.

Taarsiissuteqarnermi taamaallaat pigisap tammartup nalinganut, imaluunniit nassiussap ajoqusernerani nalingata ajorseriaataanut annertussusiliisoqassaaq. Naatsorsuineri ajoqusernerup qanoq ililluni pinngorsimane pingartinneqassaaq.

Taarsiissuteqarnissamut naatsorsuineri aallaaviusarpoq pigisap tammartup innarlernerqartulluunniit nalinga, taamaattumik iluanaarutit annaasat, ingerlatsineri annaasat, iluaqutissarsiffiusussaasut annaasat, ujariatsinerit, nalikillineratigut annaasat, eriagisatut nalingata annanera imaluunniit toqqaannanngitsumik allatigut malitsigisaanut taarsiisoqarneq ajorpoq. Ki-nguaattoornerit aammattaaq taarsivigineqarneq ajorput, tak. § 28, imm. 1.

Nassiussamik tammartoqartillugu taarsiinerup saniatigut nassiussap nassiunneranut akiliutit taarserneqartarput, tassani pineqarput nassiunneqarneranut aki. Tamannattaaq nassiussanut innarlarsimasunut, imaluunniit imarisaanik tamakkiisumik ilaannaasumilluunniit annaasaqarfiusunut, tamannalu pequtigalugu utertittariaqalersunut atuuppoq.

#### *§ 36-mut*

POST Greenland taamaallaat taarsiissuteqarsinnaavoq, tassunga ilanngullugu nassiussanik aningaasanillu tammartoqartillugu nassiussinermut akiliutinik utertitsisoqarsinnaavoq, nassiussaq POST Greenlandimut tunniunneqarsimasoq imaluunniit aningaasat POST Greenlandimut akilerneqarsimasut uppernarsarneqarsinnaappat.

Uppernarsaasiinissamut piumasagaat naammassineqassaaq, assersuutigalugu akiliinermut uppernarsaammik atuuttumik takutitsisoqarsinnaappat, imaluunniit akiliineq akiliutit nalunaarsorsimaffianni takuneqarsinnaappat.

#### *§ 37-mut*

Nassiussap tunniunneqarneraniit imaluunniit aningaasat nassiussat allagartaat atorlugu aki-lerneqarneranniit ukioq ataaseq qaangiutsinnagu naammagittaalliortoqarsimassaaq. POST Greenlandip taarsiisussaataanera atorunnaassaaq piumasagaat ukioq ataaseq qaangiutsinnagu POST Greenlandimut nalunaarutigineqanngippat.

Allakkanik aningaasanilluunniit nassiussinerit pillugit naammagittaalliorneq Kalaallit Nu-naanni allakkerivimmi sumiluunniit pisinnaavoq. Nunaqarfinniit naammagittaalliutit allakkerivimmut qaninnerpaamut nassiunneqassapput suliareqqitassanngorlugit.

#### *§ 38-mut*

POST Greenlandip taarsiisussatut akisussaaffini naammassissavaa, nassiussaq tiguisussamit suli tiguneqarsimatinnagu nassiussisumut taarsiissummik akiliinermigut.

Nassiussivigineqartup nassiussaq tigareersimappagu POST Greenlandip taarsiisussatut akisussaaffini taamaallaat naammassisinnaavaa, taarsiissut nassiussivigineqartumut akiliutigiguniuk.

#### *§ 39-mut*

§ 39 atorneqarsinnaavoq § 28-mi naammassisassat naammassineqarsimappata, § 28-mut oqaaseqaatit takukkit.

Aalajangersagaq manna pissutsinut allatut ajornarluinnartunut aalajangersagaavoq. POST Greenland pisuni ataasiakkaani taarsiissuteqarnermut maleruagassat nalinginnaasut malillugit taarsiissuteqarsinnaavoq, ajoqusiineq taamatut immikkut

illuinnartumik pisimappat, POST Greenlandip taarsiisussaataitanera, kapitali 7-imi aalajangersarneqartoq naapertuutinnngitsutut isigineqarsinnaatillugu.

Aalajangersagaq manna malillugu taarsiissuteqarneq taamaallaat pisuni ataasiakkaani pisinnaavoq nalileereernerup kingorna, tassunga ilanngullugu nalilerneqarluni ajoqusiinermut taarsissutissap angissusaata nalilerneqarneranut sanilliussineq.

Aalajangersakkap kingunerisaanik siunnersuutip § 28-anit allaassutigimmagu taarsiissutissap annertussusilerneqarneranut amerlanerpaaffiliisoqannginnera. Aamma nassiussat suunissaat eqqarsaatigalugu killiliisoqanngilaq, taamaattumillu aalajangersagaq manna malillugu allakkanut nalinginnaasunut tunngatillugu POST Greenland kukkusimappat taarsiissuteqartoqar-sinnaavoq, sullinneqartullu taarsiiffigineqarsinnaatitaanermut nalinginnaasumut maleruagassat malillugit taarsiiffigineqarnissaq pisinnaatitaaffigissallugu.

Aalajangersakkap matuma atorneqarnissaanut piumasaqaataavoq:

- Nassiussamut tunngatillugu sullissinermi POST Greenlandip tungaaniit kukkusoqarsimanissaa sumiginnaasoqarsimanissaaluunniit,
- ajoqusiinerup pissutsinik immikkut ittunik, nassiussap assartorneqarneranut atasumik nassiussisup tiguisussalluunniit nalinginnaasumik naatsorsuutigisinnaanngisaannik peqquteqarsimanissaa,
- tamatuma ataasiaannarluni pisimanissaa, aamma
- ajoqusiineq immikkut pisoqartillugu pisimappat, POST Greenlandillu taarsiisussaataitanerani killissarititat, siunnersuummi aalajangersarneqartut iluanni malinnissaat tulluarsorinanngippat.

Taamatut pisoqartillugu siunnersuummi § 35-imi aalajangersakkat oqaasertaat apeqqutaatinnagit toqqaannangitsumik ajoqusikkanut taarsiisoqarsinnaavoq. Nassiussamik nassitsisup tiguisussalluunniit taarseeqqusissutaanik uppersaasikkamik pigisaqartoqassaaq.

Siunnersuummi § 39 pisuni makkunani atorneqarsinnaasutut eqqarsaatigineqarsinnaavoq:

- Nassiussassaq allakkatut tammarnaveeqqusikkatut imaluunniit allakkatut nalilittut nassiunneqartussanngorlugu piareersarneqarsimavoq piareerneqarsimallunilu, kisiannili nalunaarsornera sullissisumit peerneqarpoq, nassiussarlu allakkatut nalinginnaasutut nassiunneqarluni.
- Nassiussat naammaginnartumik poortuusersorneqarsimagaluartut, nassiussat transportbåndikkoortitat ataatsimoortut ajoquserneqarput
- Nassiussaq allamut usilersuussinermut assigisaanilluunniit suliaqarnermut atatillugu nakkartinneqarsimalluni assartuummik qaluneqarluni ajoquserneqarpoq.
- Nassiussaq uninngatitsinissamut piffissaliussaq

qaangiuterujussuareersoq utertinneqarpoq, taassumalu imaa nassiussisumut naleerulluni. Tamatumani nassiussisup nassiussivineqartulluunniit nassiussamik ujarlersimanissaa, tassalu maalaaruteqarsinnaanermut pisinnaatitaaffimmik atuisimanissaa apeqqutaassaaq.

#### *§ 40-mut*

POST Greenlandimi aalajangikkat Naalackersuisunut maalaarutigineqarsinnaasariaqarput. Maalaaruteqarnissamut piffissarititaq matumani aalajangiinerup maalaarutigineqartup nalunaarutigineqarnerata tigungeraniit sapaatit akunnerinik sisamanik sivisussusilerneqarpoq.

Taarsiivigeqqulluni naammagittaalliutinik aalajangiinerit POST Greenlandip taarsiissutissatut killiliussaasa avataaniittut, siunnersuummi § 39 naapertorlugu, Naalackersuisunut naammagittaalliutigineqarsinnaanngillat. Suliat taamaattut eqqartuussivinnit aalajangiiffineqartarput malittarisassat tassunga tunngasut qaqugukkulluunniit atuuttut malillugit. Tassunga pingaartumik tunngaviuvoq Naalackersuisut isumaqarmata taarsiissutissap qanoq angitiginissaanut eqqartuussiviit ilisimasaqarnerunerat, taamaattumillu naleqqunnerpaajusoq aalajangiinerit tamakku eqqartuussivinni suliarineqarpata.

#### *§ 41-mut*

§ 8, imm. 1-imik, imm. 3-mik aamma 4-mik, §§-inik 12, 13, 14 aamma § 15-imik unioqqutitsisut Kalaallit Nunaanni pinerluttulerinermut inatsit malillugu akiliisussanngortinneqarsinnaapput.

#### *§ 42-mut*

Siunnersuut manna naapertorlugu malittarisassiarineqartut tunngavigalugit, malittarisassanik unioqqutitsinermi akiliisussanngortitsisarnermut maleruagassiortoqarsinnaavoq, tassunga ilaallutik allakkanik nakkartitsiviit aammalu allakkanik ammaasinnaanermut malittarisassanik il.il. unioqqutitsinerit.